



鴻慶居士集補遺卷七

帖

與王元海九首

某頓首車蓋遠臨欲治薄具接慙慙之歡而村陋不能遽辨恩恩別去迄今不滿被誨具審新霽動止萬福使旋上記不宣

某頓首尊公高才不爲世用齎恨以沒傷屯悼屈宜見於銘文遂不復辭而晚年文思衰落未知能副昆仲發揚幽潛之意否也

某頓首長牋寵賁細讀彌日褒譽過情固不敢當而立意遣辭不襲蹈前人一言一句波瀾雄深不見涯涘非近世之時文也方欲具書占敘歎仰因來聊布一二令弟昆仲比辱一顧老眼未果一

一奉記言謝

某頓首比枉車蓋臨賁邱園喜奉俊游而村庖市遠治具菲薄爲愧分別未幾已勤誨問具審雨餘動止萬福冥晦兩目眵昏上記略不宣

某頓首尊公銘已就大概言文學政事之材尊主庇民之術不見於功名老於州縣以沒足以副昆仲表見之意亦知欲竟此一役於外除之前當撥冗繕寫上納不敢孤所屬耳

某頓首貶謫就審暑溽萬福某荆溪舟還欲遣報問接對遠客無虛日忽被堂帖付以八九十翁不可勝之任方徬徨驚顧而未有所處也

某頓首老去廢耄一朝大典付之筆削已不敢奉詔太守示報令赴行在衰耄支離杖而臥起亦不任朝謁果有此命當以情告免相子之厚重勤存省第極感銘

某頓首比枉書餉已具報問信宿履御何如畏景如焚不當勤省察老鈍愆期屢矣始踐五日之約也不宣

某頓首尊公墓文納上夢得以文學政事知名太上皇召見談治道中上意言聽計行遂處囊脫穎矣而讒人間之不見於功名一誌論次終始如此所以副昆季發揚幽潛之意

與徐穉山侍郎三首

某頓首再拜上啟每辱寄聲承宿恙未除某亦頽憊不任問疾伏奉海函欣聆已遂藥喜健筆縱橫粲然溢幅壽福鼎來固不任占矣即日履茲初暑恭惟台候動止萬福某攜幼詣荆溪展墓歸舟次城闈少駐而後反舍怱怱上狀

某頓首再拜上啟蘇黃門記直節堂以爲物之生未有不直者一爲物所撓雖松柏竹箭之堅不能自保惟杉能遂其直求之人蓋不待文王而興者黃門未嘗以言假人而推重令祖如此某撫卷三復因書占敘嗟歎不足之意乃蒙令似宗丞刻石俎豆於諸公間狗尾續貂殆無以爲容也

某再拜上啟令祖在朝一時命世之傑皆得而友之蓋盡疏氏名刻之碑陰如柳儀曹所記先友者頃讀東坡作孔長源輓詞有南荒尙記誅元惡東越誰能事細兒蓋孔子所謂剛者而不知其事其後得曾南豐類稿於謝任伯中有長源一誌輓詞云云卽誌中

所載也令祖與之遊又識其子常父於諸生中而不錄於先友此缺文也先公將漕淮南某時待罪冊府獲奉周旋但知前有荆公後有張無盡爲知己省書又知二公蓋相得於參禪談道中也入偈蓋出於此復得所未聞幸甚幸甚

與徐守三首

某頓首再拜比枉教猶在几案又勤誨飭具審歲晏沍寒台候萬福冰雪之交踞一鑪袖手危坐履聲不出閫外十日矣上狀恩惠草不宣

某頓首再拜伏蒙馳貺東坡欒城山谷諸刻開闔數過不能去手欒城集中記二卷如棲賢直節二堂九曲快哉二亭納齊東託六記超妙獨出某已成誦但知南康徐公之賢不知爲何許人也至是方知少保公之父穉山閣學之祖則家學淵源固有自矣方在逐客流落頓仆眾人踐蹋無嫌之時公顧之獨厚閱三世而曾孫使君表而出之開讀竦然高風絕塵發於遐想不意垂老獲此動

心駭目之觀幸甚不可言也

某頓首再拜荆公筆跡蕭散簡遠不踐古人自成一家嘉祐末陳和叔內翰以集賢校理判鼓院荆公爲三司判官晨夕往從之故詩有畫寓棹塲常至夜冬泐溝約復尋春之句政和撤祕書省地建明堂諸郎寓西府一碣奇甚閒因退食則立其下讀一再至是復覩數帖行草相半亦奇迹也某嘗觀古人得郭林宗蔡中郎一字之褒遂託以不朽熙豐以來巨公碩儒名勝士公家父祖皆與之遊石章旣出盛德遺範具見諸公翰墨之上過古人遠矣

與仲隱大師五首

某啟聞名久矣尙未接奉示書勤懇喜聆高秋道腴增勝隱居在澄江相望不能百里尙冀償一見之願不宣

某再啟三洞羣仙錄蒙輟借貫穿諸書老眼豁然三復嘉歎書跋當如戒俟讀盡五編作數十語附見紙尾

某啟歲月可驚分違又見春序示書聆體力勝健隱居在望而有

仙凡之隔臨書惘惘不宣

某啟別去歲行兩周欲作一紙問無恙久不果即日清和體中勝否三洞羣仙錄屬對精確無牽合強聒之態衰老得所未聞輒課數十語敘歎仰之意一讀置之不宣

某啟讀公羣仙錄輒跋數十言占敘歎仰不謂公刻石以墨本持寄發函不覺汗下元書藏篋中適苦紛紛未暇檢納朝夕遣人馳送聞已開版卻乞一本以豁老眼重蒙記存生朝置一瓣之祝輔以嘉果拜貺莫喻感銘村陋無一物可拈出他日薦區區與胡檢察四首

某啟承示報喜聆安佳糴買悉喻極愧聒煩塼石只有二四舟之物若得如所許以大麥回舟應副遂畢此一事矣至扣至扣

某承諭及司理公欲從何樞干薦章惜乎見屬之晚也近時前執政文字皆分布於一二年之前今年薦某人明年薦某人惟監直留一二章待宰執之書司理公必知此某從諸公干薦須於三二

年先期定下既不可辭臨時遂不至誤所擬蓋非向來當路之比也司理公書言今春受代更無可擘畫如少緩猶當宛轉耳幸恕

某啟以節過遠客全集不即奉書沙田納苗須煩一諭庚宮稍寬恕也已飭團中持鈔奉呈矣冗末煩溷但有愧耳

某啟承答書細故煩瀆愧感何言已具裝赴淮西新任廬倅章大夫之官訪別已會再四祝之如更要鄭帥書臨行遣一人至取道路獨力不須過訪也

回趙知軍五首

某頓首再拜伏蒙遣騎馳賜誨函屬詣荆溪展墓遇大風雨過旬不得反舟還拜貺而開緘累紙陳義甚高不敢草草占謝但有愧負即日梅溽恭惟動止萬福相望百里雖未復款門它日都騎詣府白事庶有一見之因不宣

某再拜高文見寵詞義卓然開讀老眼驚眩不謂貴公子春秋鼎

盛之時筆力豪健雖老書生不能過也輒課數語占敘歎仰之意
聲氣之同不自知其陋也門內伏惟萬福某適在冢舍上狀殊恩
率舟還別具記

某頓首啟比聆下檐草草具一書占敘宿昔向慕之意兩勤誨教
爲禮甚寵開闔三過大慰區區卽日寒燠未調伏惟萬福某雖詹
承縣大夫百里之內必有一見之日也

某頓首省書獲在姻婭之末比具舟趨西郊展墓師武來方知公
夢築夫人之昆仲也衰老遂聯瓜葛欣幸不可言何當奉周旋慰
此勤行

某悚息薄田在境內某鄉羣盜持杖劫奪耕牛而去管莊召集保
甲追逐遂中刃傷右臂一狀乞從縣根治公如留意痛懲沙戶終
左右一任受賜人人按堵矣干溷愧汗

與妙空長老三首

某啟比遣問恩恩最師來出答誨翰墨之光粲然溢目無一點老

人衰薄之氣開讀三反喜聞履茲寒令四大輕安某欲具小舟一
詣而久未果第山靈地主嫌俗駕必償此願也不宣

某再啟靈巖絕境神龍所棲某守蘇時爲山門決數十年兼并乾
沒之訟比公榮築智積廬又得以文字紀述歲月殆有夙昔之因
也別紙推予之過則不敢當

某再啟適觀草聖千文驚歎之餘輒作數語置之紙尾而以續貂
爲愧最師畫字已分去一派詩語不凡亦不在近世名緇之下老
將家風固自應爾也

回曹旣明三首

某頓首門牆在望尙未接對被誨如奉金玉之音喜聆燕閒超勝
衰老塊坐於繫匏尙復有一見之日否也不宣

某頓首趙智夫守江陰時某嘗詣仁里智夫置酒具飯禮甚厚過
旬而後別省書方知有連而以不獲遣問甚恨

某再拜邱公道源寺丞沒於元豐二年某猶未生而名迹至今在

人耳目爲不死矣辱示遺帖得細觀幸甚輒書數語附紙尾如所
戒者門內伏惟均慶

與叔鄭學士

某頓首方圖上狀占敘契闊惠誨勤懇喜聆即日尊候常勝某適
有祝獻之冗而累紙垂問啟謝不謹好尙冀闊略不宣

與■侍郎三首

季冬凝寒伏惟判部侍郎卽日起居蒙福某跼伏鄉邦日依大庇
雲泥異路正遠瞻承仰冀精調饗寢仁須大拜式副虔禱之私謹
具狀上調

違遠盛德倏然許時比聽郵音雖審峻陟從班擢貳銓部徒與二
三父老欽羨而已自取疏外不能致賀廈之禮敢謂眷齒賜以教
墨山林之人世所擯棄詎宜有此哉下情感怍夫復何云仰惟銓
衡天下才所自出侍郎固閱人多矣而猶不棄衰暮撫問勤渠謙
德之光人未易及也未緣望履烏以敘區區伏紙重增依戀

頃者罷官得請東歸故鄉旣喜託桑梓之蔭亦庶詹望有所矜式
而侍郎亟以簡知之素輒還禁近攀附無從徒深引領今夏復遭
旱暵西成之後才十四五細民艱食逃亡間有二麥近秀它日或
少蘇側聞侍郎以舊治故嘗軫台念不敢不上布耳伏乞聰察
與鄒志新六首

屈留都騎雖以接款爲幸第使公迫於饋祀倍道而旋殊不遑也
次魏出所惠書審聞別後興居大慰暑雨恭惟尊候萬福承以令
女免乳暫過徐坊無由瞻近連獲手誨不敢虛辱草草附來使占
謝萬一

次魏遠臨衰晚喜見俊異而旅舍共此孤寂歉然名酒分餉方欲
具書論報專介踵門復枉誨帖併惠佳果情義久而彌篤銘戴如
何可言

相望千里聲音不接於視聽豈謂流離羈寓之中一見如平生歡
殆有夙昔之緣也次魏出賜書復來嘉貺友意久而深厚衰晚何

以得此欣愧之極不復云云

跽伏僧舍遠蒙徒御寵臨大慰夙昔別去便欲寓狀竟爲左右所先開緘累紙爲禮過當感愧不可言也具審即日春暄動止萬福某拘畏未果伏謁門下臨書惘惘

蒙次魏攜文見過開讀懽然汗出不唯文律句法已應有司之尺度而瞻麗俊逸非近世之時文豈特爲左右賀又喜得侍御之有後也空山旅庖蕭然無延留之具不能久駐車馬此爲恨耳

比專遣強勝上狀半年不知存亡方以爲疑次魏出遺畫書已至於左右側聞比日與居喜慰不可言也秋序已涼恭惟尊候萬福某屏迹田廬距門下二千里而卜鄰之念則日往來於懷也

與曾公卷顯謨五首

道中承進拜方爲公贊喜旋聞反汗不曉所爲計公慣見不以爲怪也即日不審台候何如某萬里生還公卷之助爲多非一書能稱謝也某今晚至城闈旅次上狀劇草草

連日親誨接又勤晏勞感愧之深即日恭惟履端多慶某蒙恩北歸以書抵諸公具舟一日而去次吳興爲公辦髹器等當馳一介也高才屢蹶於讒口履茲春高卽聽非常之間也

自聞淮上紛紛亟欲歸省其家更不入城郭欲留郊寺一夕而去不果一詣想蒙矜察

別來遠宦嘗狀馳候必已聞徹春暄恭惟台候動止萬福舊德宜在朝廷留滯南服日竝召歸之命

頃被嚴譴老妻以憂死欲治一外棺而吳中亂後商旅不通今遣使臣邱璋攜資求之封內河流淺涸難致欲告借遣數十卒津發入婺港前書已嘗布懇想蒙矜察不惟老幼盡戴使君之賜地下有知亦圖結草之報矣

與鄒次魏八首

別去雖以病懶不數遣書然懷想高致未嘗須臾去心也辱手帖累紙開讀欣快具審即日侍奉佳勝奇材老拙降歎所冀張而大

之以卒遠業

虛名誤長者遂勤都騎然一奉俊遊而空疏竟孤遠臨之意愧負
至今奉告喜聆即日侍奉多慶某竄伏山閒所謂逃虛空者何時
復遂蹙然之喜臨書悵然高文見寵宏麗精博老眼驚眩如坐圖
書之府一詩致尊公託徐子野送達恐未徹聞今別一紙去衰老
廢學技止此耳

比辱臨屈又獲數日之款談笑多聞遂傾一座老拙降歎別去侍
奉佳否令妹竟不起追慟奈何公家有一朝之憂余友失終身之
助賢淑云亡內外嗟惜公當勉爲親庭自抑也適聞移舟草草作
尊公書故於次魏不能詳具

專介委書喜聆春序暄和侍奉萬福某已決度嶺之計從尊公假
兩健夫荷擔而萬里畏塗固有望於風義之重也卻承又爲秋試
之具甚喜公名譽已繁有司去取然科舉志於得也又宜有以慰
親歡當與善良結習不廢互用所長側聞第一之傳也對策不須

多用故事場屋稍寬記問之學與挾書無辨第用古人一言一句
作爲議論如蘇進策則善矣恃心愛厚且欲早登仕版繼侍御之
遺烈輒薦死罪近有詩數篇恐妨摩厲未敢錄呈它日併以塵浼
某紙盡無由累幅上狀適有客來以佳紙來索詩度無許多詩且
輟數紙答公家書矣謾發一笑

前日草草作記報章累紙禮意兼重拜貺惕然大暑伏惟侍奉佳
適數日蒸溽如坐甑中一雨翛然無由晤對瞻依而已著述時望
錄示數篇此技唯多作乃益佳耳古文章前此志記持還它日同
魯直文納去

比恩息遣書言別損答益勤甚欣愧不可言伏審即日侍奉萬福
某僕馬已集今日與季實別遂行矣屬以待舍弟信不至遂少緩
氣候漸熱度桂嶺必在重午後也衰晚又陪俊遊乍別惘惘奈何
近世士大夫止於舉子事業叩之空空如也獨公貫通諸子叩之
輒應答江左二年心所敬慕次魏一人而已更冀勉學力行追配

古人

閒關道路四十日方次桂林嶺嶠闊絕無從詹近向往不可言大暑伏惟侍奉勝常某自宜春入衡湘境中霖雨彌旬跋涉泥淖終日不逢一人橋梁斷絕處則聚數夫之首戴一輿而涉行路之難如此已度嶺中州人士比比皆是守帥監司皆故舊次舍使令不求而辦則又恨降之晚也聊發千里一笑次魏高才老夫所畏何時復陪笑遊慰此惘惘

甬橋之別忽見春序即日侍奉何如聞春官以盛夏策士六月之師蓄銳而發孰能禦之車騎至杭當遣人伺候問所須也試罷能泛小舟一訪踐初約幸甚連遣數書不能詳具

與桂帥劉立道十九首

伏蒙調護授館示書恭審大暑台候萬福罪人入境憂懼非一重蒙調護授館如歸厚幣辱賜不果拜賜適憲漕諸公致饋亦已控免必諒此意託寓麾下更兩時朝從後騎穿雲涉水之遊暮聽後

堂吹竹彈絲之樂幽懷破散不知身在虞羅中矣

別去又勤五馬出餞感悵如何可言高秋恭惟台候萬福某即日已次象臺去違大府視陋邦羈思惘然念公且代還入踐華近而某方負大罪侶蟲蛇於瘴癘之鄉接奉無期尚冀因書訪問生死長沙傳聞不一歸期少留咫尺之書尙得徹聞於左右也蒙假使令十六輦途中極得力今遣還內蔣得躬薪水之勞於庖爨甚力且欲少留於向來供帳器用之屬盡已交納主管人去獨有兩幕在此方葺謝氏園屋朝夕徙居之別介馳送也

連辱兩書慰藉之言甚寵三復感怍具審小雨台候勝常某比蒙恩貸得免繫維方趣裝詣大府辱遣十卒負戴而歸酒釀之饋亦已拜嘉惠顧之厚孰如公者來日拜謁併列感悵

向以董推姓名聞於左右公不廢言亟蒙慰薦受賜一等也尙有少懇比歸更欲假十卒周其行得在送還數中庶可致信撫問也儻蒙終惠幸甚

過都數蒙治具薦拜珍餉爲禮過矣辭去又勤臨別千騎出郊冠蓋盡集寵餞之光衰晚何以得此感愧之深薄寒恭惟台候萬福某已次清湘境上塗人皆傳折守參樞幕計公又須解裝少留也益遠情深惘惘

衡陽折守少款方游浯溪淡巖少留清湘別聽朝命殊無意公還也軍書紛然道路詢弭節少駐亦不惡耳即日台候何如某已行次江表去家二千餘里如吳中路不梗猶當盡此歲也黃雀與令升同爲一器託分獻一筋恐分遣易壞故同之旅次上狀草草去違大邦遂卒此歲不審比日台候何如道遇折仲古已不作度桂嶺計在位聞攻李嗣舉公造朝猶在春夏之交也戎馬之塵不到五嶺坐嘯南邦不妨吏隱所冀善護慰此勤頌

接奉彌時受賜不貲感極至於無言意者放臣逐客當令純一之流折辱困苦之庶幾知悔時而自反適會故人弭節南嶠曲敦雅故又設肴醴出姬侍以娛樂之歷數前輩千萬人蓋不一遇感愧

而已秋高恭惟台候勝常某十一日已次象臺但有孤城巍然出於黃茅白葦之中竄殛之餘一切任運不計喧寂也令升早以文采自表見於世一從持斧風采凜然便有御史諫官之望所願善刀而藏之以卒遠業幸甚抵此卽館於謝氏之堂明快可喜太守餉一羊不敢辭付園人謹食之以俟諸公如約奉從容也酒粗堪食乃金溪白酒之傳品令升玉友之附庸景淵九醞之奴隸也宜人告致區區雖屢接樽俎終以公名位之尊狂言屢出復吞爲恨耳

使還草草上記亦復餘月比日履茲冬序恭惟台候勝否族壻潘尉竟蒙存護感忤妄意欲出門下去年關升狀如未有人敢望采錄皇恐

過蘭溪往外遣騎見招終以拘畏不果往令升他日自衢趨婺自婺入蘭溪不過迂四五十里遠歸弭節少留樂親戚之情話想欣然命駕也到杭便望寄聲客舍所須併及之幸甚

至象山三日卽遣狀審已聞徹卽日寒燠不常台候何似某近徒過謝氏一室靚深竹樹環之開廣心目可以度炎瘴癘疫之厄戴公之賜如此邱山重矣少意李耕道以書抵閩陳逢源昨晚度嶺欲備使令於幕中流寓遠方食貧口眾景淵少隱頗哀之屢更世患亦解事如蒙甄錄必不以尸素居其官也帥座聞已有代期二漕使並乞一言致區區危坐一隅日俟輶車之出

連獲兩書告以歸期來介戴星疾馳三日至象山愛厚至此感歎不可言也具審卽日台候萬福某上書叩闕蒙恩有自使之命皆游談之助也省符以爲徐君所發公欲啟觀無害今錄一本上呈但重致羣狙之怒耳一戎妄作已而大懼一夕解去倍道入昭賀而奔矣孤蹤初欲少安於此渠旣逃亡令升亦可闊略也某已假使令趨入桂不必更遣介區區見索言

急足去後便蒙遣介趣還行至修仁又專枉使馳書見迎感悅不能喻也具審寒雨台候萬福某萬里生還復見天日區區志願滿

足無餘辱諭延留之意如某戀德豈有窮已第以久客歸心如馳而禮遇豈可孤當爲公留五日而已況令升還朝亦不晚矣區區想辱照察

德升書已領德升約到三衢枉道過之度三衢已盡此歲家山在望不能越渠約也又致大光意欲遣騎邀過長沙少款敘方維由千里命駕亦不能也太夫人次萬福

擯棄三年交游解散毀書滅跡故人情義之重不忘久要如吾儕蓋有幾人而已別去感戀如何可言某來日次全州距門牆未遠日仁公之還也

急足至辱書便附景淵上狀去矣卽日不審台候何如自見大麻日後召還之命比次長沙道中日馳數金牌如過電非吉徵也車騎少留未必不爲福耳

過宜黃留一書並鵝鮮約季高自豫章回託從事付文以還今已至門下否卽日恭惟台候勝常某今日登舟自富陽遵陸入餘杭

復具舟泛太湖由吳興路還家矣世路多艱何時復陪一笑之適
我亦惘然

阻闕兩時度公已解印臨川致鵝鮓三衢又遣一書不知悉達左
右否即日伏惟台候勝常公方造朝而乘輿還武林簡注已久卽
慶超用也某到家又聞幼女之喪乃章出也老妻逝去惇獨無依
念之不能去心比歸已病卒數月矣哀哉哀哉愁坐無聊作記殊
草草計公已北轅尙冀續遣矣

與廣西少漕趙隱六首

興安附李巡轄上狀並納二帖以還計聞達久矣卽日恭惟台候
萬福去違彌月已行盡湖南入宜春去矣止有逋卒三四輩亦不
乏事第聞策免將相乘輿狩吳門誓師道路籍籍殊可驚桂林眞
樂國也黃雀與景淵共一器上初欲分遣恐開發香味稍變況景
淵自有宰社家風想不在丁寔矣

久聞殊遇念德如昨卽日不審台候勝否某已次三衢去家尙干

里方免問鵬之憂又聆爲魚之患滄海橫流未知稅駕可爲太息
到常買綿人還別上狀

甘棠出餞忽復許時不審台候何如某去家三年故物尙存獨有
逝者日遠祇自悲耳念得罪時官遣吏卒驅迫上道十二歲幼女
牽衣泣送至是亦屬疾而亡獨見孤冢在草棘間人誰無死哀哉
乃至於此極也鬱鬱不自聊遣狀草草日仁還朝咫尺之書尙得
至隱几

買絹得富陽中絹五十端已詳具景淵書中矣更有委因書示及
海錯輒馳挽它物還介不能將立道令升度已受代桂林巖谷舊
游暇日不可虛擲異時中州無此樂也

流落殊方復見神明之胄羈旅釋然更蒙置酒飭劇歡卜夜高辭
妙語四座傾聽一洗蠻煙瘴雨於嶺嶠之南幸甚不可言也別後
不審台候何如部使者臨之遂安行至貶所流行坎止付此身於
造物未覺居夷之陋也日仁臨按勾車馬之塵慰此惘惘

被賜頻煩空言不能占敘向面懇宗祀後欲遣一牒至行在所便望遷差一謹健者只候需音丞馳一介上浼矣比欲以女子適李師武方此遠謫且欲男女有所歸一書報及所冀以理自遣無甚戚戚也即日不審台候何似某距赴貶三月而老妻訃至次象江遂祥禫存沒負愧如芒刺在背矣叔夏送往事居禮無違者較之老僕又可以少寬而無憾無由面慰敢乞衛生自厚

與陳景淵十二首

甘棠出餞忽見窮臘履端恭惟多慶胡騎屯泗上虜情叵測若止為襄陽牽制之謀尙容假息萬一有所待何地置老夫也維揚之託經此大擾必在吳中當便尋訪付買絹人上報今自衢登舟避地者皆南某獨北向窮命抵虎無如之何方時多艱再見何如臨書惘惘

投畀窮荒會故人持節嶺上握手一笑豈復有流落之歎別去彌旬感戀不可言也高秋不審台候勝否某罪戾之身蒙曲折調護

雖賓客奴隸無不滿意而衰老廢痼報德亡期將恐齎恨於無窮也比日次象臺暫寓行湖少葺謝第居之猶在二天之下定不失所也何時出按以踐曩言慰此竦跂繼此只用一紙之書告守此約也太夫人壽體萬福華宗告致區區此曲此聲何時復聞爲之悵然也向有酒券託常巡檢上扣告假二大餅滿注之乞一介馳送不爾盪沃酸壤以口腹千里勞人恃眷舊乃敢爾也海錯乞一二種欲稍近鼃鼃未果也

蕭寺分攜未幾問勞之書已至開讀灑然喜聆即日尊候萬福拘維於此託附末光次舍使令一切順適不知在客中也一戎與羣小狙繫經司諸卒已而大懼代者到郡累月不得尙及是解印綬一夕引去自荔浦由昭賀入道永去矣可發一笑也王幹權巡檢五日而代者已壓境中書令二十四考郭尙父之後更無人也別紙記九日山水之遊諷誦一再巖穴之勝曉然在目便可鏡之石爲不朽之記也何日南轅日仁前驅如望歲矣

二十一日急足去草草上狀聞前日尚徜徉閒關不知已登几案否家僕至又領手誨感戢之深喜聆即日台候勝常某訴章朝聞詔音暮下恩許自便此朋友傷屯悼屈之助也閒欲發緘而止今錄一通上呈乞併示少隱運使也讒逐累年故人之在朝者莫爲出一言窮迫不獲已必又觸怨家之怒以此益知處世之難也某已治歸裝許遣二十夫荷公終惠然陳守已爲辦此第得李巡轄者逆於修仁便安行至大府矣區區面稟不復云云方附憲司急足上狀而陳初至奉誨帖去象兩日又領一書於郵傳中感著不可言具審比日台候萬福某蒙恩北還已辦裝矣又辱遣卒輩趣其歸逐客無此例也酒醴醢醢亦已拜賜存撫曲盡至於此窮老獨未知報德之方來晚伏謁占敘感悰祠堂記技止此耳不知堪入石否四巨公名績偉然文惠一事故不能獨載此老繆之罪也十日之留又勤治薦具拜餉遺眷恤彌厚以戀德之心而有念家

欲去之意二者不相待也感悵而已即日伏惟台候萬福記文改竄納上途中無臘紙不暇別錄口告移改付石工也至興安尙餘三酒券已無用卻封納乞分納少隱也道中草草次衡陽辱專介示誨草草辦答少徹左右也即日伏惟台候萬福某自衡山捨舟走沙道入宜春金書牌自吳門入荆蜀者六七家在三吳三千里別舊家之意時爵躍於車牛也臨江何令以黃雀見遺三百枚作一器中有肝心醬尤爲異味乞分與少隱運使開發時貯以淨器稍乾則沃以佳酒而不釁之當不壞也三衢登舟草一紙之書附還介塵省覽矣比日不審台候何似某上元日到家適見江上班師車駕還餘杭吳中亦按堵矣第公持節嶠南家在江北相望萬里之遠比方買臨川田作一窟計景淵它日問舍勢須少比尙冀追曩游於江湖之上也某及里門始聞幼女之喪瘡瘍亦大作愁病相仍遣狀恩恩到家卽以所附書抵諸相知而惇裕兄弟亦見過云訪景淵所祝

不知所所在方爲徧求之報章自曲折也吳中物暴貴米斗六百餘他物亦稱是委市絹又以非時無佳者爲置富陽中絹五十端但苦邊幅短狹耳每十端各以有賈須與少隱中分也陳初至新淦以疾留遂不復來卻令帥司一卒同包以還幸察別去忽見歲野處一塵欲致一書不果李夢築過行在草草作一紙待其還想未經省察專介損教具審即日台候萬福世故紛然莫急於兵食漕輓之才得公數人可濟大事比聞代還歎惋彌日日仁新寵慰此馳頌

公解印後必不留寇境中然湖湘歲可憂當少留清湘否又一守噲伍病廢承乏無與晤語者去城二十五里有礮巖寺奇甚水竹幽茂僧舍寬潔暇日可奉版輿一游以俟詔除也某自還故址日從事於園圃第懲廁儒冠之誤雖蒙甄復拜賜之後度之高閣如避焚溺矣因風尙冀一訪之祠堂記文大書深刻震耀儒俗公之意也憂患廢學無以副左右褒顯潛德之光更蒙裝飾見遺拜貺

第切愧荷金丹鍾乳荔枝餅亦須重意存記之厚俯逮荒遠何日忘之

與李耕道

次象山得謝圃居之便懸一榻俟公如約奉告審已改轅殊惘惘也具審即日起居勝常示畫一之書讀之懽然近世故人之態何爲遽如許它日次不敢拜賜也憲書敢不盡力但公兩趨溥涪中道而反諸公必不樂更須藉少隱一言助之庶幾可諧少隱遇昆仲獨厚一切無所計耳

與永守趙君宰四首

人還上狀必已塵省覽即日不審台候何如某寓象江已見秋晚炎風赫日不減長夏意緒殊昏昏也所幸至於授館飲食所須不_五乏使君不以羈囚見遇可以泰然卒歲矣沛然得受一廛於封內區區之願偶便奉此所欲言者非千里之書所能盡也度桂林兩日道遇使者得所惠教喜聞起居狀又拜珍貺旅食乏

絕之時欣感不能喻也即日恭惟台候萬福某蒙恩生還詹溯郡齋已次境上輒以野服造門如公略去殊度乃敢前也別紙喻以章鹽之說妄也儻有之豈得見屬來時少隱見詢方怪其無根比發書尙軫高懷殊不曉重意向來立賞捕之亦妄也去違尙新傾向如昨即日伏惟台候萬福某行湖湘路閒兩日矣治聲如出一口計公必不久於外也六卒四夫俱至宜春旅途所濟甚大迫行草草不能盡感謝之意也

與永倅時昌辰

病懶多畏久不聞記不審秋高體力何如某至桂林少留更詣象山城市鳥言夷面不類人境偶得謝氏扶疏堂居之寬潔有餘且杜門屏迹以俟赦除也代期尙遠歲晚尙得一奉從慰此牢落與桂守蘇仲由三首

向來徒御道入桂林猥蒙臨屈越日造行次而大旆已南矣念欲致一書謝不外訪便不獲祇以負愧不審即日台候何如某犯秋

暑至象山襍被獨來意思惘然所幸使君一見如平生懽吾事諧矣豈復戚戚於既往哉無由詹近臨紙情結

詔行恹憊遣狀草草蒙誨答累紙開讀三過不覺慄然汗出具審即日台候萬福某去家已兩日而使至旅舍占答崖略不敏宜得擯斥之罪也

鄙事煩浼咄嗟而辦初欲過桂林待報已蒙遣騎馳送益以感作蕉荔致餉厚意所臨不敢辭並示藥物悉已領矣

與劉彥脩閣學二首

蒙垢累年舊交新貴毀書滅跡徒御南來閒關萬里非於意豈暇相哀兩賜屈臨慰此孤寂如公高義始一遇也高秋不審台候如何某上書誦冤恩許自便羈寓之人亟欲北轅不勝侍公還也高記臨別之書皆公妙語何其神也某已老不復與世閒關矣日

仁召歸以慰中外之望
比次象江之臺邑大率如江湖閒一避地處也既無盜賊之恐而

魚稻豬羊酒麪之類比江湖閒無半直未易鄙棄也白距象只數舍唯阿之相去爾更得賢使君如賓從有與晤語者計安坐以俟召節之來也

與李廷先提舉二首

自罹讒逐水陸萬里僅次桂林便欲更僕趨象而諸公留度暑遂復少駐側聞故人弭節海上蒙穢自屏不敢以書先之奉告喜聞冬溫台候勝常某蒙恩放還諸公分遣數十卒竭來桂治裝去象已兩日矣道中拜賜占謝不謹好

別紙問所需感忤某一飽之外無所求也子昭諸郎及民服得近書否向來狼狽過三衢民服調護甚厚別久不相聞矣比得常州書信壽以疾不起爲之廢寢食者數日知之否

別王簿

過別墅謂得一見偶聞屬見便有嶺海萬里之隔恨惘如何比日體候勝否扶疏寒光二詩漫納呈公當具一石並以初寮詩刻之

使中朝之士知有昆仲不亦善乎某便數日度嶺益遠千萬慎疾自重

與婺守李德升尙書九首

四月中自臨安入衡湘度桂嶺暑退卽趨象坐席未暖蒙恩放回還道中令升遣介致所遺書開讀三過感悅不能喻也具審卽日台候萬福某聞令升與諸同輩遣卒迎歸桂林治行更數日去此度盡此歲方至三衢招呼固所願但去家累年不能枉道一見而去千萬亮之

某以歸期茫然欲與女子擇一壻而不可得至象因識李士美丞相諸郎如瀆老者初約程昌禹爲姻丞相薨背程不如約某遂壻之已攜之俱矣舍弟罷長興寓村舍未有館置之地欲從公求一權局少留治下俟有婚期告左右津遣至餘杭當以舟迎之某至衢別遣一介俟報也柳子厚名重中朝人尙不肯與之姻如某正當取人所棄焉耳

張侔示書併致公所遺誨帖已草草具報祝掾人至又領手教喜聞起居狀履茲新春台候動止萬福春序乖冷雨雪彌月丹邱亦復爾耶道中數書絕妙開讀三歎祠館少休正堪琢句天台雁蕩之盛當盡驅入筆端矣聞新田有百斛之入此可慶者第別儲一困歲增益之加以數年挂冠於神虎門而去矣百順想不輒通好二公引去之早庶幾於穆生醴也若少留豈復見容得失何足道但讒頰翕翕可憎耳何由面諭臨書悵惘

相望二千里區區疎慕未嘗不在門下而窮僻無由時致一書問安否被誨勸懇具審溽暑台候萬福承寓丹邱甚樂固所望也公著籍金閨就問珍館祿秩既足以紓啼號之憂而潛深伏奧又免與俗子爲伍何爲而不樂正恐詔追而來未必全公之樂耳歸田歲餘寢飯之外以書自娛而已每觀古人刀鋸鼎鑊非意之禍惕然警悟得幸免於今日以此益欲滅景掃迹於人間尙恨去州縣不遠答書對客無虛日此可厭者向來客江左一時士大夫

相與於交親解散眾人藉躡之時貴其真也比獲首邱有一等素不相子之人以寒暄無益之詞肝膈不情之語交相酬應不惟汨喪精神而一語疑似便醞釀以爲口實此其可厭也某今秋舉三殯於宜興山中作冢舍數椽大事甫就時具扁舟讀佛書其中庶幾稍遠其可厭者自非一見安能究所欲言

跂踵門下未嘗去心窮僻欲寓一紙而道無由虞守遣介致所遺書三復有欣對之喜具審比日台候勝常某方就舍傍營一巢以寄衰朽雖極勞費作繭不得已也別巢一堂號種瓜它日公過吳中當具舟邀迎爲十日之留奴白飯馬青芻皆可辦也

某以三殯久不克葬今春卜兩塋於荆谿山中相望三十里其三椽營兩冢舍勞費彌年始獲竣事而衰老作苦遂感瘡癘呼醫調護經時乃復屬此寒令病翁守一爐危坐忽盡此歲辱書存省殊慰落莫具審即日台候萬福淮上交兵洶洶今小定矣虜人出疑兵連數十空寨對韓壘而以精銳從

騎斷其後羽書交馳吳門大震公卿侍從已具舟楫賴將士力戰破之不然吳中州縣亦左衽矣然朝廷以西北士馬壯健尙堪使令時所以汲汲求復中原者非它日吳兒所能辦也第國用空乏勢必取於民而官吏並緣徵發如雨官得其一吏取其九此一事獨無措置甚可惜也令叔籍湘中舟楫之利亦豈得已如叔詣田園墳墓在此今其力足以遠去遂詆爲非令叔身居在所其家自難遠適亦各隨其力之所及而已然適國之患且置勿言也吳人夜聚爲妖不御酒肉連絡村舍十室而九此可慮者向來鍾襄起湖北連數十州遠近皆應士大夫之外皆其徒也如陸逸中數百家無一脫者非若虜人長驅於通都大邑而可引避於無人之境也今此輩雖無奇謀大慮爲社稷之憂遇君親如途人視官吏如仇讎兵禍已作比及討除而士大夫爲魚肉久矣每端居深念如佛經所言顧視其尾已焦使頽然無居世閒意比聞范覺民耿伯順相繼卽世悼念至今不衰獨吾二人得遙相望於二千里之外

而所寓窮僻不時一書問無恙爲甚恨令叔儻在南方有婚姻之約今以舍弟長女歸公宅相衰晚之幸也分頒荔子已領重意筆二十枝以向所寄不佳今倍直爲之似稍勝方就臘中製數干當再致也三摺席一牀同納恩恩不及緣飾如襪被遊赤城可攜以俱耳祝掾蒙異顧孤寒方求薦援乞一言爲寸進之階也此書聞徹度已改歲日埃徵拜慰此馳頌

專介貶誨存問遠客開讀三過喜不勝言具審履茲新春台候萬福某四年流離水陸萬里幸遇公爲東道主人得從一笑之適固以欣願至此問途自衢入婺趨蘭不過迂數十里初亦悔之然世議迫隘俗子疑人若枉道過公必又喧呶累左右不如想望之愈也重辱招呼誨諭懃懇竟不獲奉教必諒此意小舟跼踖上狀草

扁舟過境上三枉勞問之使慰藉懃懇喜悅之深具審卽日台候萬福比還幸遇故人爲東諸侯而不敢造鈴下衰病多畏因噎廢

食可以一笑也更十日當入里門萬一吳中不便卽攜孥受公一
廩固無嫌也公餉黃柑荔實甚豐眷意之厚敢不下拜輕舟急漿
操紙如醉筆上狀極草草

鴻慶居士集補遺卷七

鴻慶居士集補遺卷八

帖

與李德升給事三首

比解印綬行次霄上蒙遣介追路遺書致餽厚禮種種嘗草草報
謝併敘感悰已塵觀省矣彌月不相聞乍寒體力勝否伏惟台候
萬福某還故山四境無所聞度可以卒歲矣但窮絕無便介欲時
致一書訪問起居狀厥路亡由所冀輔安神明以須顯拜

圭寶嘗不能忘懷又一族人以此見望前驅過杭時諸童僕奴參
拜嘗蒙告語以在錢青江關白相君歸而聚談遂見某久無衣
冠不敢以野服拜謁戲下謹上狀起居

某在象得李婺州書具言參政遣騎招延之意過蒙恩紀固欲一
望履舄而去屬此久客家事狼狽不可言倍道疾馳比至吳中已
盡此歲區區之情想蒙哀察某愚暗自用仕不知止造物者調伏
以萬里之行始悵然自反遂掃景滅迹於人間矣惟是瞻溯門牆

臨書惆悵

與萍鄉宰何利見三首

分攜許時便有嶺嶠之阻相望而已蔣全至及婺州遣介連獲兩書喜聞起居狀且審縮縣章而還感悅不可言也即日伏惟台候勝常某負謗累年厚祿故人旁觀太息而已獨有利見援之羣仇眾怒之中一洗讒誣萬里生還蓋古之豪俠季心劇孟之傳顧茲衰晚何以得此區區感悰非一言所能占謝也某自象臺入桂林三符皆次第而至衢陽道中又辱專介以書見迎驚喜之甚某意公未造官尚須枉道一至州上豈復更有它歧也

路歸又出治下屬此紛紛念家不去心不能盡公延款之意留恨至今即日不審動止何如某去袁日專以公屬使君當不復掣肘矣今書又理前語更望加惠一方少安無躁也幸甚

三衢寓狀後以上元日到家又聞幼女之喪家人輩痛定悲哀清夜獨有老夫向隅而已閒遇老幼共集親黨相過具言利見待遷

客之厚救援無告之冤往往相視感歎第相去二千里之遠寒溫之問亦不以時致左右爲愧恨也即日春序已暄不審尊履何如利見宰縣已久邑人必有息肩之漸也某方就舍旁築室數椽待李親之來又欲卜地三殯之未葬者細故紛然方自茲始竟此二役便終老於田間冀因來一訪之

與袁守陳次明五首

客居萬里遠勤問遺獨見故人久要之誼草草寓狀審已聞達何令遣介又貶誨飾恭審即日台候萬福某誣得白遂獲首邱之望已次衡陽向來西郊善禱之言蓋有以相之也更數日詣城府區區留面叩

已次境南兩奉手誨如獲晤對之喜恭審晴寒台候萬福某今日次萍鄉爲故人留一日而後去行卽詹近不任喜慶之懷也二庖宿食於此經月方能遣窮途蒙顧獨厚正當風厲衰俗豈但小人被賜而已宜春名邦溪谷之勝暇日領客吟笑其閒新詩幸

見寄也何令計蒙特顧一書併煩遣騎也
東城臨別忽復改正但有區區懷德之私履茲新春恭惟台候萬
福王師留屯淮楚吳中幸無恙今日自三衢趨富陽經餘杭絕太
湖由陽羨路以還矣某次上餞爲韓保之少留四侍兒英妙獨步
江東酒半歌公所作秋晚長短句音節疏亮響徹行雲醉客妄見
相恍若公侍兒在旁矣讀此發一笑也
萍鄉何令且告寬假用其所長或能惠此一方也蒙借遣諸卒途
中極得力小卒無故逃去耳庖人且攜至常別上狀
與湖憲馬中大三首

自公豫章平反之後道德高風照映一時區區嚮慕冀得一見道
出衡湘數勤都騎喜慰當如何示書喜聆即日台候萬福某舟楫
已具盡出大惠詰朝告行尙得面致
蒙得厚贖已當面稟自羅汙累所過二十州一金之餽皆不受儻
容守此戒何啻千金之惠也不果下拜惶恐之至

異縣有一見之喜又復言分祇深悵惘晴寒不審台候何如蒙具
兩舟承流而下少貸行客登煩之勞去都一夕北風打頭凡四日
方次衢山窮人所向自應爾也又三日至朱田舍舟遵陸趨醴陵
路去矣正阻詹近敢冀善護以須新寵

與湖鹽晁府判

聞風久矣道出封內一再款接實副所聞大以爲慰示書伏審台
候萬福贖遺豐腆荷存錄之厚屬罹垢汙朋友致餽飲食之列皆
不受若拜賜於門下則得罪者眾矣尙冀恕察

與蔡清老縣

恩恩辭去益我惘然辱書具審即日動止勝常髹器上煩初以二
分券金不能遠攜而去始未有此謀特蒙遣騎馳送又不喻以元
給之直方極慚愧已次宜春請叩不及祇受極不遑也坐有客占
報草草它日訪便續遣

與衡守裴少卿

託寓府舍辱館置之勤感愧深矣即日不審台候何如層城屹然橫互湖流之上想已落成所恨不能爲公大書深刻以助動心駭目之觀也某已次宜春益遠瞻悵

與袁州知錄阮若虛二首

萍鄉傳置所遺誨帖喜聞無恙道中不卽占報爲忤卽日恭惟侍奉勝常某蒙恩北歸漸近中原復見故人握手一笑欣慰豈有涯哉

流竄嶺海兩獲瞻近綈袍戀戀獨見故人別去又勤遠餞懷感至今不去心也春暄不審侍奉何如以上元日到家人謂有生還之喜而悼亡之悲正自不禁也偶二卒歸草草通好

與徐子野

自投嶺海望中州如在天上辱遣兩介致問遺益見耐久之情也卽日不審尊候何如二月六日離象江十一月九日次袁州此月可至臨川傳聞永豐寇復出麻嶺路不通當自豐城枉道入崇仁

造謁久客念家屬聞洵洵第有倍道疾馳之意念公厚愛如此當一見而後別也

與鄒志新

子野遣介得聞動靜爲喜不審體力何似某負謗之人不免叩闥蒙恩自便皆朋友遊談之助也但聞陳義者死於道路益重老夫之罪目今不遑俟到門下當以數十千贖其家也某聞幼女久病念之欲奮飛以志新嘗矜護於眾人藉躡之時尙須一見而別也與范季實運幹二首

家僕至象併獲兩書之貺審聞徙寓宜黃甚適比日寒冽尊履何如某萬里生還漸近中原復與季實相遇於曩日杖履經行之處慰喜當如何來書慰藉累百言開警不逮風義之篤三復感歎某今日已次宜春更旬日詹近草草書一紙爲之先

流放三年季實猶敦姻好護纖悉至於飲食衣服之閒比還老幼夫集追頌盛德相視感歎而恨未識公面也比日不審動止何如

乘輿還武林當一詣行在去敝廬一葦可航而至也區區之望如此某舟行吳中城郭皆是追念往者已隔存沒憂懣不自聊入門又聞十一歲幼女亦亡一慟之餘殆不如無生也偶便上狀極草

與胥澤民二首

家僕遇公於宜黃能言起居狀又辱誨帖慰喜倍之即日寒冽恭惟侍奉萬福某投畀窮荒追想吾髯於五嶺之外豈謂復見蒙恩生還歸路又入宜春隱居在望當策杖登門一見公而去又欲聯轡到宜黃見季實端友諸公同一夕之款又幸也

久客山中從公歲餘甚樂再過仁里念欲追曩遊而公獨不款恩就別祇以惘然即日伏惟侍奉均慶春闈已有詔旨馬首之西當在長夏所冀慎疾伫觀昆仲聯名於淡墨之上也

與葉彥忠學士四首

宜黃還介上狀已復經時即日台候何如似聞宜川人情歲事皆

不及前妙覺佛舍深穩古松流水之下課諸郎讀書亦避地之高致也王子欽還夔子欲枉道入宜黃出嶺而南過門必求見故作一紙問安否某屏居歲餘頑健如故子欽能言之不復重陳子野遣介得所遺誨飾尙聞僑寓山閒大以爲慰即日不審台候何如某久負大謗至於籲天出於無術行此下計維僅免五嶺瘴毒之厄必觸羣公切齒之恨進退惟谷祇自憐耳某後月三四閒至臨川伫當一見不復詳

自從先大夫捐舍館歲月可驚已見春序創巨痛深體力何如高才雅望罹此大故號慕之餘進道益德顯揚君親庶幾在此某到家又哭幼女舊感微瘴於膚革閒至是憂鬱瘡瘍大作奉記草草志新追路至湧路橋欣然有調護門下之意邑人欲挽留端友新制云爾如何公巢南之議當復已矣

與宜黃令鄧端友二首

投棄遠裔便與世隔不果遣記便中辱教慰喜之深具審比日尊

洪興補遺
五
候萬福某自與蠻蠻爲伍不復見中朝之士矣忽聞恩貸還次江表屬聞麻嶺路塞方議由豐城道入崇仁度曹山嶺諸大邑一見之喜可屈指而計也區區面致

過邑屢獲奉接盛具大烹爲禮已過而勞賜亦下逮於吏卒區區懷德至今不能忘也即日恭惟台候萬福宜川有願借之意邑人欣賴某方欲受一廛於境上挽留之願豈減邑中之黔第聖主側席之久又恐公不久於枳棘之棲也更冀勉強自厚

與韓保之侍郎二首

昨晚奉周旋爲慰經昔不審台候何如盛具出於特顧豈敢自取閒外久客念家屬此洵洵日懷阻絕之憂輒欲控免來日侵早趨三衢而去區區此情必蒙照恤

屢接言讌大慰久闊恩恩就別亦復惘然即日恭惟台候萬福比蒙治具大爲左右費而四姬英妙獨步一時鐘鳴漏盡遂至忘歸黎明登車猶能續殘夢於邯鄲道也履新卽慶亨復慰此馳頌

與信守李吉甫侍郎四首

過都一再見殊慰望思更蒙盛具延伫爲禮過矣祇以感忤移時伏惟台候萬福區區具在別紙尙冀洞察

自罹汙累遇孔方兄如冷齋曲水也流放三年厄陳屢矣親友之餽終不敢受示書餉物意兩重不果下拜冀蒙矜亮若於門下獨辭他日當棄絕之罪

去違大邦又勤五馬出餞衰朽之光履端恭惟台候萬福某已至三衢舟楫具則去矣盛德雅望久留於外屏僉論傾伫卽慶召歸之命

孤旅蒙特顧燕勞之勤度越常禮已深銘荷八卒謹甚俱至三衢今令負轎送李親至婺卽還戲下蒙賜厚矣恩恩遣書豈盡感悰與衢守常子正舍人二首

自投南嶠日聞登進賢者得路實慰昔心歸途至三衢又遇執事爲地主遂償一見之願竊自慶也歲晏餘寒恭惟台候萬福謹上

狀

適獲詹近爲慰移時伏惟台候萬福某蒙餉酒醴甚荷厚恩意不敢違只乞龜峰十罇飲客此外屬饜而已餘罇回納敢望恕察與范師厚直閣

十年婚姻之好方遂一見之喜健論抑揚傾聽灑然一洗炎瘴之餘幸甚別去不審台候何如去營從如造朝爲敝廬一水之近常遣騎問所須也方至衢客舍草草附便介遣狀不能詳也

與孫德發朝請三首

悲懣無惊未果造門兩勤徒御喜媿之深使臨奉誨飾具審餘寒尊候萬福某以瘡痍作苦方如所教療之第已脫瘴嶺未免鬱林屈之烹可以一笑也

向王幹言似以微恙呼醫旋聞藥喜老懶不果上記未幾亦已中溼遇疾彌旬良已遂扶憊至中山破土昨晚還舍嘗枉手誨仍拜甘瓜之饋不時啟報慚荷而已雨餘伏惟尊候萬福某舉三殯葬

於湖湫涓日以九月鄙事滋出矣正阻接待祇深竦企

大旆屈臨獲一見之喜屬以甚暑不敢久留又以恩惠分背爲恨信宿恭惟尊候萬福某以葬送之役百爲無不關心勞生如此可以一歎造朝必需新涼埃顯擢也

與無逸兄朝議二首

頓仆道路餘三年不果遣還次里門訪聞起居狀審聞三七嬪太宜人棄捐館舍恭審孝慕追慟奈何履茲新春尊候萬福某萬里生還老妻幼女皆斷棄其命養生送死獨見於明哲保身之士如吾兄者可以少慰而亡憾矣敢乞抑哀自厚

比歸餘災未退瘴毒作瘡良苦方俟少閒一至馬跡省章氏藪塗回舟過都場便造苦次又以衣冠久廢欲以野服見未敢爾某至象臺董推出兄書乃錢塘特所遣與之相從逾月而別過桂林從劉帥乞一改官狀與之矣

與張思召郎中三首

自罹嚴譴不敢以姓名聞於人世閒側聞綰郡章於嘉禾亦不獲
寓書贊喜專使貶誨開讀灑然如獲晤對之喜具審即日春寒台
候萬福某還家經旬瘴毒之餘瘡瘍大作遣狀殊草草

愚昧仕不知止自觸憲網無可言者老妻何辜遂斷棄其命比蒙
恩貸萬里生還而幼女逝去已見宿草一慟與之俱亡也親舊移
書問勞遣介不能將遠舍弟貯之盈筐頃蒙誨帖及示亦拜賜矣
憂悶之悰未果占謝又枉問遺名酒致饋爲禮益厚拜喜感塞不
能言也

十姐逝去殊方獨哭自不能堪時擇承休二舅亦相繼下世妻母
老境更此百罹何以爲情也百二感一房久寓左右五丈母長女
資裝已具郊禮奏薦又及妻母位高義凜然一宗蒙賴歎仰不已
某方令舍弟爲小師飯僧未還卽至馬跡歸後須一至臨安見妻
母自湖至東林只枉道十餘里耳第恐已還朝廷不容一見也
與葉少蘊資正四首

辭去已三年雖向慕不去心而崎嶇兵亂求一生於百死之中衣
冠筆硯皆廢區區素情無由自見於竿牘所冀聰明洞照閣略苛
禮遂置度外耳

疏慵治劇俗狀滿前方欲撥冗具記過蒙恩紀不以位貌爲閒貶
賜誨飾開讀凜然不敏之咎豈敢自恕也

靖康以還屢更大變去死一閒耳偶然得罪便脫吳門之禍以此
對病爲樂不復有居世閒意誤恩守杭懇辭兩月餘不獲命航湘
獨來危坐破屋數椽臨見吏民如一行脚僧一遇結夏不得去耳
資政天下第一邱一壑久從閒佚公議鬱結王唐翁訟言於
朝不去口殆所謂不得其平則鳴也比造官承乏於泰發之後城
上設筵離數千板羣胥並緣爲姦費民財二十萬於潛又築退保
屋二千區如九里松湖上三百年壯觀斬伐爲樓櫓過半而鞭笞
天竺僧作東坡祠急若星火盛名之下固不敢輒議而尋求其故
終不可得四務公庫無一壺煮酒廩中無粒米方遣一官屬以時

價求之湖秀境一斗爲錢八百四十軍糧用八千斛比至新穀既升度用四萬斛爲錢四十萬緡終日營營求錢乞米常恐不獲私家卻未有此患殆業緣使然也近已追復會計揭帖故事刻舟記遺又可笑也

輒以圓緘占謝不敏故不能守所戒者繼此只用谷且徹聞於左右杭幹不賜鄙外甚幸

與胡給事中

蒙告命遣騎愧荷之深某自脫籠檻屏居幽閒天寬地大徒步自由及是拜賜又若吳牛之見月也無由占謝謹上狀

與袁守

蒙以郡齋見客此舍蓋公故事也衰陋何以堪之罪斥衣冠竿牘之禮俱廢輒具狀幸察

與朱大卿二首

去秋致書餽適留宜興冢舍比歸而使人已行故不卽具報念念

凜然建茶比公如約茗飲遂不乏方食新時朝中故人亦有分餽如老兄所遺有便卽致之不計早晚也東坡云涼天佳月卽中秋開菊花時乃重陽不須以日月爲斷當作如是觀也
丹荔屢拜佳貺客至出之磊落釘坐之珍下視山肴野蔌矣焦葛頃在京師嘗見之漢時閩王以荃葛餉吳王渢卽此物也第爲左右費極不遑矣

與晁府判

在桂林訪數兩香爲孺人土宜無佳者陳漕按瓊許爲置來卽分獻前日忘記言之

與何中丞三首

咸平人回蒙答甚寵閱兩月不奉記早寒不審體力勝否議者洵洵傳召還之命至於三四尙未見除書意者國論僉諧而未上不則卿大夫延頸舉踵以望來歸人之喜聞稱道也興頌如此雖欲久外可乎惟冀強飯自厚卽慶超用

雖不數寓狀見文植扣詢動止亦足自慰中丞官簿應在諸公之
右居閒益明練它日獨運廟堂盡得斯民之利病友功志節衰落
第是田野中受賜一人之數耳忽聞子蒼病疽且傳已物故天下
豈復有斯人乎伏計共此戚戚也

近上舍院有司於試文中疏其繆上聞遂勤詔諭然文章之惡極
於紕繆則黜之矣何至徵暴其短而又欲置之有過之地也中丞
負天下重名宜爲斯文之司命一旦去國多士無所適從至於受
侮益可歎

與汪湖州藻二首

鈴齋在望風便一日爾拘縻於此未有侍見之期瞻悵不能喻也
專介損教如聆誨音感悅無量具審隆寒台候萬福履端令節膺
受多福卽慶大用

蒙以齋釀爲餉已拜厚餽豈但使君綈袍之意山中之人以爲寵
也感戢之甚爲郡鮮歡想當然耳使者以威見臨尙可以柔道理

之而將卒怙亂宣索無藝尤所不堪公欲舍去肝鬲之言也然開
府未久須少忍埃之舍弟荷庇存老懷遂少安田里又辱收錄臚
醢亦足矣止爲一飽之圖也

與孫祕校三首

伏辱報貺開讀灑然暑雨伏惟燕處清適許臨幸甚不唯兒曹得
親誨飾又衰老獲奉周旋也

違去已見長夏門內多故欲一紙問無恙久不果比日眠食佳否
諸幼更病館醫無虛日衰老無聊何時一聽名理之談以破溷鬱
秋闈揭板遂躋前列精金美玉庸人孺子尙知貴愛況識者乎更
須面賀

與孫伯野給事四首

曩者罪斥頓郊寺聞公亦還朝寓普照以趨舍異路不敢相聞道
路彌時及是方有投足之地久闕上記區區瞻素之懷殊未有以
自慰也

比者備數臺院愚暗不察向背樞省中司可階而升也觸情妄作
卒以譴去然魚鳥之性自適於江湖未見所忻戚耳伯野造朝任
參黃散之閒尙欲傾耳聽一鳴耳

小邦本無事日受訟牒數十皆累政不決之訟片言折獄雖不敢
妄意古人然吏詐民冤具載尺牘之上往往一閱盡得之亦有足
樂者第書冊屏寘一隅舌本燥強試吟嘯以瀟濯之便作明年更
有新條之句它日得相見非故我矣

日者起東南屯兵防秋所須急若星火唯恐以乏軍污齊斧也廬
州鈐轄司王循德已罷趙武節者權攝日受渠數十牒皆約以軍
法從事頗候陳中玉到官少貸斧鉞之誅留落中何所不有聊發
千里一笑

與湯常州三首

自公縮郡章乃獨有二天矣猶未窮掃門之役忽貶誨存開讀汗
下具審雨寒尊候萬福某名在罪籍屏竄一涯進有強聒之嫌退

有譴絕之懼以故伏拜之謁將行而趨趨可以一笑也
比趨宜興祖送一二姻家之葬處文舍人旅殯二十年至是亦就
窀穸道過城府又省一族子之喪初欲留一夕祓除而後見屬期
會已迫遂循城而南節過專詣鈴下庶幾奉周旋以慰契闊
公下車彌時固欲陳拔薤之薦而大手破劇奏刀春然積壤之蠱
一洗亡餘竊伏下風擊節欣快徒有愛莫助之之歎

與李少愚侍郎三首

曩者舟虞次臨淮時枉徒御以爲衰病之寵屬茲疲曳尙休惻一
二日伏謁行次而舟楫已西不敏之愧至今猶芒刺在背也
多病早衰比歲增劇李公數留泗濱數日欲去而病軀自度可以
風矣遂往謁之又中寒而病公素遣醫臨視三日乃愈而歷陽候
吏亦來因舍舟臥車中以去閒關數百里將入郡境而交代移文
見卻又止全椒彌月至是方有息肩之地勞生如此可厭可歎也
某疏蠢豈通吏道而喑啞求生又性所不樂據案之初空囿可羅

雀也會未閱旬而鉗紙尾見治者盡拘而入之然庭中鳧鷖殆不成行也

歷陽三里之城而僑居之士不減二浙吏士殊畏之遂有黃天蕩之目如某愚拙豈堪郡寄然未至於號天不測之淵耳聊發一笑與施中大

晨夕馳心門下而劇暑如此一紙之書莫能致之新涼台候何如向來益宗見訪具聞端居恬養之適此學佛之明驗也然區區尙欲少進酒肉以益受命使儒釋合而爲一可乎

與潮州蔡子大中奉二首

別爲念公萬里之行犯三伏之暑未嘗去心專介委書喜開藩已久上下安穩無恙冬序寒冽伏惟某官台候萬福某承乏凋郡道盡途窮累丐閒不得請竟以罪去乍脫池檻殊覺翛然初不計得失也潮州並海無瘴避世之士如蓬萊弱水之隔公縮郡紱坐嘯海上正佛書所謂極樂世界豈可同日而語哉尙冀安輔神明慰

此馳頌

三十妹宜人別來喜聞安勝老媪兒輩附此申奉姑夫中奉姑姑而次久別極於思跂不果別書也超宗已授承務郎恩命皆荷訓獎之賜蒙惠水油篤耨沈水已拜珍餽島上卒然無以致區區之勤畫扇十柄謾馳送方冬致扇極可笑然度其來便還郡已是君揚仁風之時也黑篤耨差燥其香不遠它日爲委識者尋來一兩滋潤而黑光者因便介寄示不必以白爲貴也特眷予殊不自外令嗣承務孺人而次一一佳宜便不別問

與楊元光

窮閭掃軌面壁而已迺蒙元光遺書累紙執禮甚恭如見所畏達觀一視非世俗所能量也四明去就何如不一行作吏便有束帶折腰之歎卽慶新渥慰此馳頌哀詞奉呈先公潛德當屬大手筆發揮幽光以副盛意鄙文聊致區區一哀耳一讀置之可也與劉開府二首

某自罷歸跼藏田里瞻睇旌榮無數舍之遠而私家無子弟可倚
仗不敢舍去致門牆之恭惟是北望拳拳實勞鑿味履端無緣稱
壽所冀膺受吉祿卽正台司以慰中外之望

伏蒙存記貶損誨飭兼致壺酒海錯之餽甚厚不任榮感某寓湖
島漁樵爭席久矣而大騎吏臨門祇拜書餽豈特衰陋之光實山
中之榮觀也區區占謝不盡感悰

與李參謀

衰老不數上記竦跂之深卽日尊候何如丞相督戰諸道並進都
有復見漢官之喜幕府策勳計在朝夕別行展慶■詣情席主簿
就官蕪湖將母而行以壁抵雀立於千兵萬馬之中憂懼非一冀
子建有以全護之

與臨安宰兄仲齡

過邑獲接奉甚款而禮益厚別去欲致一書別敘感悰島居訪便
無有殊愧不敏卽日伏惟履候勝常某已脫池檻復還田里頓覺

翛然遂遣舍弟還長城官次私家細故種種靡不經懷親客過逢
至今未已勞佚固有命耶仲齡官蒲應在諸公之右尙流落州縣
眾論稱屈翁而後張固自當然所冀安輔神明以需寵薦

與虞守三首

自承開藩雖未獲侍而屢勤誨飭具聞起居狀亦足以慰大手治
劇如破竹然庭無留訟老吏震駭謠頌已至田間邦人凜凜然惟
恐召節之行也

某比過餘杭婦家至荆溪又少留還次村舍聞公行受代矣衰老
託寓一廛恩顧獨厚豈減臥轍之氓也自公領此州教條寬簡闔
境晏然无疾呼急步之警及此代歸邦人度不可借留徒有截鐙
之戀況此衰老感悵尙何言

屏竄一隅重蒙存省酒醴致餉邦君之賜俯至窮陋豈惟衰老之
華閭里聚觀以爲寵也恩恩占謝莫盡感悰

與陳祖言祕校閣二首

學省分攜不知書劔所寓奏名喜聞先登亦不果馳慶示誨勤懇具審卽日起居勝常想益磨厲以須大對側聽第一之傳也向黃豸示鄉人公據十紙既歸悉已分送獨不知公所向竟煩遣介殊愧不敏謹封納上厚禮屏居不能辦答幸察

與韓樞密三首

盛德雅望廊廟之具屈臨一障造物者拙於用人矣仁聞袞衣之歸以福天下

晉陵小邦大臣領州方自公始年來徵斂小閒人情亦紓獨有一諾待公畫也

開藩之初士民胥慶如某宿昔鄉慕未嘗一望盛德容貌而廢痼之餘又不敢以野服見臨書太息

與孟仁仲郡王二首

廢痼五年安於田里不敢以姓名徹聞於執事大人之閒不圖恩紀錄布衣之舊遺書勞迎衰病增光三復感愧之深

開府相公一世之英養恬神館殆襲祖宗之故耳多故之時舊典廢格略盡獨此尙存使高才盛德不見於功名可爲天下惜也黃封小團寵賁衰晚重意所臨敢不下拜某屏迹田舍眞成一翁耳忽睹上方賜物老眼恍然尙能續邯鄲之夢耶感著之誠空言豈能盡

與張參政二首

忽傳致道兄逝去初不聞被疾奄忽遂有死生之隔手足情鍾計深悲痛也某衰病無由臨弔姑致薄奠以薦一哀而已

異時學校知名之舊獨致道兄爲不遇晚得一官詔墨尙未乾又奄忽至大故如公安得釋然所冀自廣勿過戚戚幸甚

與孚壽

有客來言孚壽有愛女之喪於太平教院遂遣人偵問云設次在焉惋悵久之數日不相聞遽有此變猝然遇疾救療不及相見悼悲不能堪也苦寒體中何如悲撓出於意外未能遽遣試與標老

周旋當有補於左右也無由一訪勿得戚戚幸甚
與葉左丞

投老百罹偶然不死愚暗寡慮真有愧於穆生也別紙諭以夢境
三復至言願見舊國故都已在槐柯之南矣

與標閣黎二首

臥病彌月久不遣問苦寒戒體何如乎壽有愛女之悲一書勉之
煩附便介惟望眾生受無量苦皆生於一愛五濁根流無有出期
若能一念跳出苦海所謂極樂國世界決不在流沙萬里之外也
故刹起廢非道德高風一方崇尚孰能響應如此某習懶未有趨
城闕之意殊以不得造觀爲恨也信壽提舉宗族之英遂沒於中
年可爲哀痛

與錢公壽撫幹二首

伏承先公提刑朝議奄終壽祿凡與交遊共生悲悼恭惟孝思遠
罹大故追慟奈何所冀抑哀從禮慰此馳頌

與先公交契甚厚自聞屬疾亦欲一詣臥內省候洛陽諸公皆云
親舊莫得見者遂不敢前比得訃音不圖至此適自湖泖上墳少
留山閒又不卽致奠第深悵惘而已到家已聞護喪過山中矣尊
夫人一抔土未乾而先公相繼逝去荼毒難堪豈尺書所能開曉
襄奉必已涓吉所冀節減摧慕以終大事

與內翰兄二首

比蒙專介貶賜誨飭具審卽日尊候萬福承已剡奏乞閒可見知
命無求之意儻遂從欲解轡少休鳴蛙或賢於兩部鼓吹也世事
多乖恐不得如雅志耳更冀眠食自厚

舟中得見制詞數十首伏讀竦然靖康以來獨於吾兄斂衽無閒
言也索序引無乃非其人乎然例當得一副本只午門狀紙百番
戒一小吏直書大字見賜居閒無事爲兄讀之必無雌霓之誤

與葛邦美縣丞二首

村舍遇暑如被燔炙及此新涼瘧痢交作盡家呻吟雖舍弟亦不

免此久不遣狀辱貶教喜愧之深具審即日動止均勝公屈佐邑人樂其寬始有懷恩之意豈不堪爲滕薛大夫耶聊發一笑晉陵久旱而雨得歲獨江上薄田大風駕巨浪潰圍而入人牛幾不免也孫德發病風痺竟至奄忽高文奧學舉世所無至今悼念不去耳情之近有豕婦之喪當一通書故交零落獨有吾二人如太白殘月而以避地各在一方不數相見因來人附一紙訪問死

與張翼野

田閒遇暑如被燔炙垂虹對月一笑之樂也豈復夢見新涼不審體力勝否小詩送牧之恐喜事者醞釀以爲罪未敢遣並以道中數詩錄呈當一笑

與標閣黎

垂老投荒深愧道友比歸自屏雖公在世外亦不果相聞奉告喜承戒體安隱大暑異常具報恩

與何利見

比辱騎從遠臨衰老拘病不盡延伫之意恩恩就別迨今歉然宮祠新命不惟慰愜高懷亦老夫所望如此穩坐山中營葺三逕足了此身殊勝投身火宅中也某以痰瘧連夕十餘發對食不能下筋氣息僅屬無由奉答口占令小兒具報

與趙少尹二首

向以罪徙南方蒙一顧之不知身在嶺海之外矣還復故廬一室空然幼稚呱呱豈復有好懷也吳中雖大稔盜賊亦少閒米直減尙五百第盡此歲江上無所聞又得浮生過一年矣火光帥蜀想公甚惜去然班公是行若登仙矣景淵受代當少北客居部中以徐除命猶足追桂林罇酒之歡否

蒙委曲書問安否益見矜存全護之意流寓象山寵光所臨種種宜適出有車食有魚矣忽起望想於劔鋏之閒恐後復有曹元寵者見嘲遂已之可發公一笑也

與葉彥忠二首

人還奉手教恭審履茲春序台候萬福某退伏田里避人避世眞成一翁矣別紙鐫誨猶以故我見望銘佩至意愧不能當也何時接侍慰此所向

少晉山中安貧守道教子讀書與古人無閒矣計日尊仰正在此也弟外除不晚必有召歸之命公枉道一過伺候稅駕當以楫迎區區別後之懷庶獲傾盡

與朱縣丞二首

自頒書餽晨夕望車馬之塵被誨喜聆前驅已頓郊寺且審春寒客中佳健某已汎治一室奉延積歲懷抱冀一見占盡

蒙惠茶及丹荔枯蝦之餽甚拜賜銘感未敢辦答俟舟楫入里門當陳微贄

與會公卷運使四首

向來弭節里門故人不遺窮陋委書存榮甚厚當具記占謝令平

江毛汝能馳送審已陳省覽島居窮絕久不嗣音惟是區區念德之意未嘗去心也

蒙恩守杭皆自推轂綿薄不勝委寄之重而疲懦又畏程督之嚴勉就道所恃賢使者護其所短一一警誨之幸甚

高文起廢讀之眩悸不自定偶林季野於胡茂老坐上追記一一相與擊節固已成誦矣黃魯直張文潛遭罹憂患筆力老退不逮前作惟公獨否此殆亨復之漸至於獎予期待之過謹再不敢當也

側聞使車按嘉禾方圖一望斧繡之光比造郡已不及使司本在杭所冀來還晨夕得奉周旋日跂前塵於道路之側矣

鴻慶居士集補遺卷八

鴻慶居士集補遺卷九

帖

與惠主簿

亡弟易簣亟蒙憐悼馳書存撫孤寂老懷憤憤信筆作謝不復記
省云何但有愧負微涼伏惟萬福某方卜地治葬送百為紛然自
茲始矣殊非疲頓所克堪任也

與許右丞

某備數臺院屢獲接待誨音屬聞除書正位兵府而某以不用所
教旋復抵罪去國卒蒙全護尚畀郡符區區之情豈不知感跂望
門牆瞻拜亡期臨書太息

與提舉中大二首

罪罷復還故山喧寂有閒矣念欲遣一書非專介莫能致騎吏臨
門遺書見寵幸甚過望不可言具審即日台候萬福秋防四境無
所聞臥護一藩履茲新歲卽慶詔追慰此馳頌

伏蒙存記以新釀見分豈但衰病懷感而山中之人以爲寵也屢拜珍餉愧荷之極乘輿北轅必無久畱錢唐之意吳門當有以待幸臨它日萍齋豆粥辦於咄嗟人將以爲神也不知何如

與張時澤寺丞二首

比獲瞻對蒙顧甚厚又勤徒御出臨喜愧不可勝言別去便欲遣書洲居窮絕非專介莫能致日仁見過踐曩言

聞過西山畱一夕侵曉遇順風行百二三十里至馬跡日未昃也四郊無所聞山居當益勝更冀爲親自重

與餘杭張吉老

兩過大邑數款言燕而吉老送將之意益勤感藏至今別去欲寓書占謝洲居窮絕非專介莫能致不敏祇自訟也卽日氣候未齊伏惟台候萬福歲暮四境無所聞來春欲攜婦一過臨安餘杭如公未召擢尚冀接慇懃之歡也

與新恩元祕省二首

向來學省與令兄遊甚款待罪臺端復與尊公共事世艱契闊久不相聞竊讀高文榮躋鼎甲又喜少卿公之有後遣書甚寵慰說無量具審寒冽尊履勝常何由接奉償一見之願臨書惘然公移方欲馳送竟煩遣介不敏愧甚某竄伏島居不類人世圓緘厚禮無筆吏使令不能答幸察

與汪彥章內翰

前日騎吏臨門辱教寵且拜酒醴之餽恩恩報謝不盡感悚歲晏寒冽伏惟台候萬福少意聞舍弟隨牒過臨安護役試吏之初殊未更事若躬薪水之勞於千官萬兵之中必有意外笞罵之辱非託庇之本意也然臨視營造一使臣之粗有才力者可辦也如令臣主辦而以它官監督正得事之宜伏望特賜解免釋此憂縣幸甚專介上扣更不敢以屢紙加禮也冒浼惶恐

與惠次山

衰老不堪作勞百病交攻彌月而復久不遣問比日不審體力如

何忽聞閣中臥病何爲遽至此也伉儷之重追慟奈何某兩遇此厄追數親舊中結髮至老者指不可屈也所冀抑情自遣與宋成德大卿

企踵門下日有遺書之意三家之市求便不獲方具一緘問安否禁宗聞徹葉進武來領手教開讀三過喜不可量即日大暑台候萬福聞令嗣彥逢遽棄盛年遠地初不知之今復歲餘悼念當少衰不復追區區之設也所冀爲大夫自厚慰此馳頌

與張牧之宣幹

伏蒙遠致奠饋又勤徒御衝犯塗潦臨視空封道德高風追配古人非衰老之所宜蒙也某還舍席未暖遠客手生書債如積欲遣一紙占謝亦不以時致左右恐愧而已曩時養素坐客太半在鬼錄獨老身無恙耳意欲移居自近追復舊遊而驚怯多畏已復出入如投林之猿耳可以一笑

與思永

領誨示承雪餘尊履萬福某宿恙未除改齋而食豈敢以口腹累人重蒙饋餉珍饌輔此衰朽厚意豈敢忘也

與常州太守三十首

彌月聲聞缺然比傳北使旋軫想已遂坐嘯之適即日早春尚寒恭惟台候萬福旁郡紛然方以賢者獨醒爲懼伏讀詔令右公爲可賀也

戶部公賦集讀之終篇號舉子業而貫穿諸書無所不記比方館置一客飭訓兒曹俾之日夜傳誦庶幾於萬一謹以納還又某有錄尚未竟者它日持送

某頃蒙寵賜雄文節序恩恩酬報不如禮乞敢焚之今別繕寫一通上呈

追榮考德二集同納魏公社稷之勳固以銘之鼎鐘與宋無極而發揚潛德歌誦遺懿又皆一時文章之傑如贈令公告配享制與一二奠文必非一手所爲而追榮考德二序亦皆奇作何其盛也

方移書王饒州乞此文矣

伏辱遣騎臨賁發函拜貺喜慰之深具審雪寒台候萬福陽復於
冰雪交至之辰實大賢光亨之始日仁寵嘉慰此馳頌

雄文寵存復不能去手白公閑適之篇衛武康寧之福屬對奇麗
專以衰借衰謝非定温之常談也家學淵源有自至公益復光新
第非老退所當得於左右時序里門問遺紛然不敢附來使草草
言謝朝夕牽課別具記塵省覽

戶部公文集許借留幸甚見前輩文宗褒賞一時名士於東坡最
多可往往過其實惟荆公未嘗以言假人而曾南豐爲尤嚴比見
郭祥正得荆公數帖皆稱道其詩者中一帖云子固之言不知所
謂豈非足下天才超軼尚當繩以古詩之法乎是知祥正者荆公
所予而南豐不予也南豐序李白詩與王平父深父深父令祖文
集某懸知爲天下之奇作也今始獲一見更許少畱熟讀稍寬藩
闕何貺如之

日至重勤存錄特枉大貺高情凜然不以流落鄙遠亟拜欣荷之
深

比上記審已省察即日微暑伏惟台候勝常某衰晚憚暑杜門且
作僧夏高秋當卜詣鈴下

某欲遣一僕持書入饒信輒從戲下輟借一急足與之借儻蒙戒
兵司差擇一熟於道路者遂副所需也干冒愧恐

荆谿上冢方竟偶值生初兒女輩具湯餅趨歸坐席未暖又有祖
送橫山之役周走岐路彌月乃已聲問缺然祇益瞻悵春和伏惟
台候萬福某方弛擔疲曳之餘尚稽謹扣謹上狀

開府之初一時賓從皆得致桑梓之恭而某衰病臥家獨不獲望
履絢以爲負也比日新涼恭惟台候萬福某素病羸一遇疾便不
支持而浸淫兩月殆至委頓今幸良已而眠食皆未復但能投杖
而起卽申伏拜之謁

毗陵雖小邦實賢勞均佚之地不出旬月邦人服習教條使君可

以閉閣坐嘯矣雨餘暑氣將退小閒必已遂燕寢之適也
比過雲閒閱月而後反連雨中溼舉體皆瘡危坐一榻服食盡廢
以故久不上記第極嚮往大熱伏惟燕寢清適積雨作冷穀價騰
踴舉行平糴人人知有二天焉何貺如之

方以鄙事具記馳告度已省察牙兵傳教具審履茲伏日台候萬
福三伏之暑爲積雨所壓翕而後張炎威赫然其勢十倍殆是乘
除之理即使君於此有迎餞之勞所冀慎疾

穀價暴起大家閉糴雖當捕能禁官自出粟平其估以予民則四
封之內翕然響應公糴粟於城中而孤村窮巷數十家之聚皆食
賤米與區區以乘輿濟人於溱洧者相絕矣不勝感歎

伏蒙遣騎致七夕羊酒之餉閒冷重勤願省暖熱因忘蕙帳秋荆
公詩云爾拜賜唯有愧謝

使臨具審薄寒台候勝常庖人無故遺竄方欲扣說辱遣騎送付
殊副私家之急也小人常態旣蒙洞察已知懼矣尤以感忤寵貺

公文無筆吏占報輒具咨目冀尚察恕

秋暑彌月不衰不審台候何如側聞葺治棘圍以待秋賦諸生亦
有習歌刺史中和樂職之詩以獻於上者乎

比苦瘡瘍塊坐一榻如在鉗鉢中已更四矣投老已逃世網上挂
天刑可以一笑被誨存具審涼秋台候萬福某病體尚未脫然今
日方親筆硯遣狀恅草

戶部公遺藁初謂善本畱南豐家藏止於此也又蒙寵假一編諦
觀如獲拱寶某本欲作數句書之紙尾占敘師仰之意而南豐先
生一序爲書首不敢自貽續貂之誚也

九日令節想見賓從一時倒冠落珮之適伏蒙記存醪醴粗糲寵
賁孤寂萸囊菊盞竟日歡呼豈復計明年之健否也下拜欣荷

牙兵傳教具審早寒台候萬福田舍秋晴種蒔麥四郊殆遍雨
後蒼然已有覆塊者想大慰勸耕之意也

側聆增秩之寵公富貴功名當在晚歲未敢爲賀日佗徵拜別得

展慶

戶部公遺文集頃讀南豐集便知有此書而投老殘年多難漂零謂不可復見原有天幸蒙公不鄙畱借彌年吟誦之餘殆不知肉味矣前後所假七帙謹封納續致一編猶未盡錄錄者未校更俟編摩之後暫借旬月成就此書爲傳世之寶

比上狀審已得徹燕九初寒伏惟台候萬福大雪應禱變槁復蘇一洗疫癘此班春之澤也幸甚

被誨帖猶在手遽傳解印冰雪之晨恩恩具裝台候復何如時事多故州縣之責如山釋此重負豈不脩然想未見所忻戚也

歸田十年厚祿故人毀書滅跡惟公聲氣之同禮遇獨優不見世人寒燠冷暖之態遽此違闊區區雖欲臥轍而無由也

某初欲候伺出關具小舟追餞而大雪塞路遂成畏途衰瘵不堪衝冒故不敢前某卒嘗過臨安山中省妻母它日道出高隱當繫舟舍旁申伏拜之謁

晉陵有集之幹亦可辦也必不閒外某聞治歸楫甚速呵筆上狀不能有私懷尚須嗣遣

與常守湯舍人二首

鄉州公舊所臨第玄都之桃本無一存者儻執事拊舊物以興慈某亦是部中受賜一人之數也

某歸田十年亦無使令具圓緘之禮輒以手書省候又不敢屬兒輩遣老眼筆縱字大益不謹好尚冀公不誅苛禮他日得以幅巾

詣門下

與常守大卿四首

某削跡朝亡塊坐窮閭待盡而已故人臨州一扣鈴下高情凜然不多於燥溼區區感歎莫喻此心卽日歲晏餘寒伏惟台候萬福

某日仁報閉閣坐嘯別請一日之閒

某辱蒙盛具招喚禮甚寵而供帳聲妓肴核酒醴璀璨溢目一洗故時衰陋之氣且非老退之所宜蒙也別去彌旬方欲遣記竟

為左右者取先隆眷如此祇以愧荷

鄉州異時白太守用事人無適為之氣塞自公開府羣惡屏息善柔按指固已籍籍聞於朝廷矣其如陰功隱德消弭未然又當享豐報為十世之宥也履端之慶冠蓋盡集交致難老之祝某獨在荒遠不獲薦區區更辱遣騎致春酒羊麪之餉數為公費何以堪之拜賜銘佩而已

中祕訪求遺書猥蒙誨問某承乏冊府嘗錄傳數十書兩直北門攜以自隨維揚遭變盡喪於兵火未幾觸罪南遷還伏隴畝村舍無使令不復傳寫姻戚中惟董令升藏書甚富必有以應上方之求也

與鄒次魏

老病就衰槁百事皆廢而公遠在江表二千里之外不可以書問疏數為厚薄也比日侍奉勝否如公文行卓然宜為諸生領袖又與之晨夕相從有切磨之益也比遣吾守書亦道公父子為里中

之賢也

與魏次山

使臨示書伏審履茲歲端動止均慶雪梨梅杏入本遠蒙馳賜欣賀之至晚學為圃惱亂春風固其所也

與務德知府學士二首

某謫九年矣舊交新貴不復扣聞向見伴仲說公有枉道見臨之意席門固宜有長者車轍而廢痼之餘非所望於今日之君子也即日恭惟尊履勝常嘉興尚屈雲霄之上日仁詔追以慰區區某營一區於幽絕無人之境而車馬之道至金口止矣公它時雖欲踐曩言而道無繇也所冀因來寄聲訪問生死

與致政左司三首

屬者造門延款竟日萍齋豆粥咄嗟而辦非井大春所感望於左右也雪餘恭惟台候萬福小舟次城扉尚冀望履而公旋軫久矣第極瞻仰

向來同舟共載通夕侍語不謂客中獲此一適明遠出賜書屬役
遇雪少留昨晚方理歸楫敢即具報疏慢尚冀恕察
冬俎分餘拜賜感著適遇來使輒以黃雀鵝鮓上供一筋伏冀容
察

與聖求承事三首

扁舟次城闈冀得奉周旋而徒馭還別墅久矣雪餘伏惟尊履勝
常繫舟薦福少留復歸未卜一見之日臨書悵惘比見季野問公
安否知令弟聖遠逝去手足隳二何痛如之某衰病惡寒不能越
疆以弔所冀一慟而止也

端朝顯擢二令弟聯名並中豈惟門戶之慶閭里與有欣榮也公
度歲且復入郭從朋友晤言少紓悲懣何如

門內伏惟萬福聖猶不別狀近蒙分賜柳已手植舍下矣它日
想見風流也

與江解元

繫舟蕭寺屢勤臨過新詩偉麗有起予之歎念欲馳謝客中困於
酒益亡聊夜半襪被馳還不惟得罪於親友如公不獲一詣懷愧
至今雪後尚寒伏惟佳福履端所冀膺受祉福慰此頌言

與王通判二首

扁舟造境屢接誨音客居連雪衰老惡寒遂復馳還歲序紛然未
果遣問被誨深寵喜愧之深具審即日台候萬福未卜瞻近尚冀
保練

歲星一新獨有陳人日就灰槁猥蒙存省馳貺長牋噓枯吹生如
聽黃鍾大呂之音寶玩之餘感歎不足履茲新春恭惟膺受殊祉
某欲占頌言薦區區而親客踵來操筆復止又不敢令兒輩代作
不敏廢記宜蒙恕察

與致政左司

左司謝事高節凜然固存有紀述而詩句儂淺僅同擊缶敢圖借
寵大書深刻遠勤馳貺茲榮也祇所以爲愧歎

與劉公厚知縣

專使惠問喜聆動止淫雨經時乍晴想益超勝公厚老儒當在書林冊府而辱居簿領刀筆之間仲莫制置海道當出薦口挽公少休而諸客皆一時新貴所引遂不及公厚也鄭監聞已赴江東如有委屬告見戒當爲遣書也

與鄒次魏

機得之必來招聘益往從之乎索鄙文近作得記序四六數篇比方洵洵未暇錄呈須小緩也陳由之稅以書扣五馬別紙恐志新欲作今錄去侍次爲陳白也聞胥澤民往高安對吏鄰里姻戚結爲嫌恨遂至於此詩已過限紙卷且畱此併俟後便致之

與陳淵景參謀

向來唐君持所遺書見抵喜聞見朝便具報去矣適又領池陽所遣伏審卽日台候萬福比已班旋幕府當有緩帶之適也某近趨荆上冢舟還與令升相從甚款相與營一窟而未知所向也暑候

漸近千萬慎疾以迎休命

與張朝宗運使三首

靖康以來側聆名德於縉紳之論而某負罪去國萬里之外無從一望光塵以償區區向慕之意卽日高秋不審台候何如某廢痼十年恩怨兩忘不復記姓名矣出從朋戚於鄉縣十里閒公它日過所臨必有一見之因也

聞公欲家宜興僧舍林壑邃深齋室宏麗皆可喜而姻舊亦在旁近不落莫矣第公方榮路豈山中之人乎試記此言非妄語也某蒙穢自屏豈敢以姓名求通於下執事比見令升具言公有欲臨之意願以衰遲豈應枉高駕於蓬茅之下它日行節按荆谿當具小舟閒道見不難矣某投閒無使令輒具咨目咨問動止自非存省之意備聞於令升如疏慢廢禮皆所宜獲罪也

與張平江三首

盛名之下服膺久矣比公登朝而某以罪戾去國嶺海阻絕無由

一拜下風以償夙昔卽日高秋伏審台候萬福一州之隔距門牆不遠矣輒寓一紙爲之先

向來弭節梁溪日聆起居狀而不敢相聞令升過言辱問姓名又欲他日相從於雞豚之舍公方臥百尺樓上安得如雅志第衰病之餘重蒙存省非意望之所敢及也幸甚

吳門車馬之道而迎勞餞送棄日爲可惜秋防戒嚴益復多事茲見遊刃恢然也敢冀厚自待以俟詔追向屬仲謀就洞庭點山寺比公開藩未敢率爾上扣令升具言左右存護之意甚厚衰老餘命遂得與吳人同受二天之覆感戴空言不能占盡也

與劉季高二首

向聞公挂吏議謂已矣忽傳南徙莫知其故便欲持一書問行李而訪便亡有卽日履茲春令台候何如季高胷中可容九雲夢豈復不快於一出入息之間哉所冀調護寒暖之宜以俟亨復

湖湘山水甲天下而清湘尤爲奇麗季高不自暫休何由得至其

閒然柳儀曹記遊謂楚南人少而多石東坡寓嶺海亦有出友之歎公讀書之餘杖履所臨當舉盃屬月爲三友耶

與石提舉二首

楓橋辭去忽忽又見歲窮雖繫心門下而不敢持書問安否屬聞造境方敘區區欣頌之私又爲左右所先高詞見寵開讀竦然殆無以爲容也

自承弭節出駐一時賓從皆有登龍之喜願以衰老不獲躬掃門之役恃公寬貸必諒此意而頑頓廢禮自不遑也歸田四年屏伏村舍遇寒暑之變無以逃比從舍旁築三閒以寄衰朽而百役如毛心力俱盡但悵然作甕中之想爾亦發公一大笑也

與呂叔恭運屬

比公寓鄉縣自謂有一日之雅衰老憤然恐認顏標之誤不敢占敘省書驚喜恍如昨夢自恨相聞之晚也祁寒伏惟萬福廢痼之餘交遊解散公中朝名族乃肯通婚姻此柳儀曹惋恨而不可得

者過望然後知公爲可人也

與朱大中

伏審亡姑令人已襄大事哀榮終始存歿有光矣某歸四年念一見多難多畏百慮而後動至是遂聞訃音悲悔復何言尚有臨穴區區一哀而期會已迫又不克往抱此無窮之恨所冀高明可以情恕不然何所逃罪

與董大制三首

使臨枉教恭審卽日窮臘台候勝常歲端更始壽觴酬獻想見林鳥樾馬之譁衰遲但有區區馳頌而已

南北講解王師班旋州縣始有息肩之漸退食之餘鈴齋坐嘯當有賓從陪一歡之適獨此衰老未償荊州之願甚舉

胡騎引去如解倒懸矣屬此歲換萬物趨新重勤大貺光賁孤寂門內團樂共戴使君與物爲春之意幸甚

與劉侍郎二首

存領手誨喜聞動止蜀相去國謂公便還朝廷而曲突徙薪之功每在焦頭爛額之後何也然公豈久外者當拱而俟之耳

墨寶蒙輟賜精品逾千金之獲也欲作小詩報珍投衰多畏遂不復果感忤而已

與楊元光宣教

久不相聞老罷不足責也示書累紙開讀三過立言有作者之風論事切當時之務不謂姻戚中乃有元光可歎可賀也具審歲晏餘寒侍奉尊安又承隨計造朝墨榜奏名必不在餘子之後卽聽第一之傳

與祝得教授

被誨勤懇開讀恍然具審歲晏餘寒動止尊安高才遠業不廢書於敲榜簿領之閒尤爲德升尚書所賞衰老未死當佗一鳴以慰此心

與胡大卿

李郎攜孥過秀奉記草草伏蒙專使還答名章俊語爛然滿紙恍如對語欣慰不可爲量也兩邦相望一水可航而違闊動六七年豈無一見之因乎恐未必然也索南方書皇恐某旅遊萬里隨所見輒作數語以韻次之乃一日記耳豈敢輒過雷門也偶不在篋中朝晚取至以書付李郎傳納左右不敢閒外

與鄒次魏解元

待盡邱園故人阻絕老罪莫致區區比日侍奉何如某望公隨計復見於吳中志新示書乃不如所料惋恨而已某欲得次魏一過陋巷共蔬糲熟讀左氏班固書以資其博歲餘必有奇效懸榻以待當叱馭而驅也

與施林樂四首

去冬見寺丞叔於石塘精神矍鑠如故而飲噉大減未幾屬疾不起甚欲以百斛助其葬養正兄面戒令畱作磚墓之費更益諸公所給積俸亦可辦也而諸弟惑於師巫之言所得俸錢又取幾半

悉以營祠屋買雞豚祭賽爲此不成可惜可惜今俟其葬送有日當添助之庶有毫髮之補

宋卿書信又蒙遺騎感刻某屬渠作肩輿故令兩夫負之往來田間不謂如許大也蝸舍如掌已作魏王之瓠矣更辱存護並海而來極慚悔恩恩豈盡感悰

比領餽問恩恩啟報審已徹聞某只俟殘暑稍退小舟問途一詣高隱

乞閒審已得請長道委頓釋擔少休杖履往來東阡西陌所謂曳尾於途中者何必效區區之靈以邀鑽灼之禍也

與胥澤民祕校

子野介至問公安否審已經祥禫伏惟尚有餘慕履此窮臘體力均勝聞處盜時至禁中澤民談笑自足以懾羣偷想高枕而臥也與張希元二首

衰老百罹變故零落第聞希元壽福康寧獨殿諸老屬方屏迹不

獲奉几杖以爲恨連雨壽體尊安某方自荆谿還書疏滿前酬應
恩惠不果以累紙爲禮
生朝猥蒙記存眞得老人一瓣之供與區區瞻想星文圖畫中者
相絕矣

與宗老二首

向者繫舟蕭寺遠勤一顧客至紛然暄寒粗接不盡懇惻又復別
去喜聆春和欣佳聞公所寓松窗竹鳴一室蕭然又欲從公半日
之款何時得償此願也

林下無事更旬月閉門作夏不復出矣及此未來能肩輿一過否
舍弟亦同致此意也

與張郎中二首

自聞伯丈母下世恩召郎中奉喪入紫藤而某亦具臨安之裝謂
卽省慰更不遣問此次山中聞起居狀審已竣事言還言念婦黨
之尊平時接遇之厚遽隔幽顯涕泗交流羈旅不能爲禮姑致酒

果之奠而去亦畱書謝不敏尚有省察愧恐何言

某過西齋瞻拜妻伯大中遺像凜然如生豕舍壯麗亦如故思君
爲之子一夔足矣妻母十三孫如立竹未知孰爲門戶之繼也
與錢大夫

別去遂閱兩時辱手誨喜聆動止尊安塘冠世絕境發於夢想
老懶竟未果一詣蒙移舟賁臨窮陋而中道旋返無乃訪戴興已
盡乎省書瞻悵久之

與秦楚材知府直閣三首

卽日連陰尚寒恭惟台候動止萬福某去違門下二紀之餘久聞
寓舍在溧陽一水閒而老病畏人不敢遣問區區此心宜蒙貸察
也謹上狀

審已開藩衰晚得受一塵爲幸第新使君下檐衣冠盡集某自罹
廢痼十年不蓄幘矣故不敢以野服造見但有瞻戀之情

賢者不得畱之朝而屈臨不一障顧雞肋何足以試牛刀也公如

不棄一日之雅許以野服造鈴下當俟小閒上詣某衣冠書幣之
禮久廢不講輒以近時所用咨目致區區雖非事邦君之恭而田
舍翁爲禮止乎此也尚容闕略

與毗陵守四首

比攜兒上冢小舟沿城出小西門奏荆谿道以去不敢詣戲下勤
攬衣一顧之寵卽日伏惟台候萬福某去家浹日歸舟以次里舍
方釋肩少休謹遣狀省候

某以九日生朝兒女爲作湯餅去歲乞借四姬庖人帘幕之屬今
復欲申此懇如郡齋無宴集望暫遣侍眷存不復自作疏也

晨夕繫心門下而不敢數見重勤禮遇之寵卽日伏惟台候萬福
麩麥登場羣氓灌田兩岸車聲如雷河流僅存一帶耳大雨霈然
高下沾足青秧白水彌望數百里使君拊字之意殆與天通矣某
歸宿里田區區欣慶與老農老圃同爲一聲也

四姬蒙分遣使君班春遂至林下欣佩不可爲量也庖人帘幕併

馳送伏冀省察

與通判學士

比蒙迂屈良戢存省之厚而已不獲奉從容甚恨連陰尚寒伏惟
萬福氣候暄暖當卜一見之日

與德升宮使尚書二首

一別歲序屢改履茲春和台候勝否淞東羣魔作祟方少弭而胡
騎復出沒淮泗閒吳中之憂未艾也公寓赤城正宜穩坐已茂往
爲東道主人當日有朋酒之樂閒中獲此一適非小補也謹上狀
已茂待次移舟過田閒畱三夕而別負天之背曳途之尾各適其
適未見欣戚也令升又聞舍於荆谿已度地矣某衰病懷土自不
能遠去而令升一覽谿谷之勝遂安之然商山在劉項時乃跳兵
走馬之地其中固自有黃公綺季之閒也某嘗與令升約有訪公
之意欲上天台邀大旆一出而江淮方洶洶又墮渺茫中矣
與致政楊公二首

屏迹田閒猥蒙一顧之重而遠途觸熱屈臨陋巷自不遑耳別去
彌旬未果遣記又勤誨飾愧荷之深焦山度暑活水泱風一洗蒸
溽而又有可與晤語者獨不得陪杖履爲恨

某家有韓文善本乃云宜略識古字今新天台亦云其銘樊宗師
墓云文從字順各識職卽知沈休文雌霓連蜷自應律音不可讀
爲蜺耳令諸生讀公書不至失黏落韻亦足矣未可以語此承以
治舟楫尚冀解后

與似之龍圖

奉手誨喜聞來歸晴寒恭惟台候萬福公目眚已脫然否坐席未
暖舟楫復南區薄風露非養疴之宜也所冀調護自厚

與何主簿三首

伏蒙賜教恭審卽日尊候萬福村舍如掌大遇暑無所逃市遠晨
夕之須皆無有大廈崇深諒不知寒暑之易節也使還上狀

屬者客居里中屢陪先公尊俎之末高辭大辯不見老人衰憊之

態別去未幾遽隔幽顯追懷強記博識之君子世不復有斯人矣
臨書太息

與陳子高參謀

向聞子高有臨辱之意日望車馬之塵久之審已造朝竦跂而已
示誨勤懇具審比日尊候萬福履茲初暑敢冀慎疾以須徵拜去
冬省二兄亦造隱居而子高方趨幕府去矣念公方著婉畫以卒
功名而待盡山林何由晤見臨書惘然

與石提舉三首

履端君子光亨之始不獲陪賀客之後公行年當預聞於楓橋坐
上固不俟區區之祝也

某考室正坐狂耳比徹除一故第於江上而水涸膠舟不能至匠
者爲一圖揭之坐隅如佛書所謂妄見影事也蒙問輒私布之
與董令升待制

辱惠書承春寒台候勝常聞公有三衢之命公方問舍亦一助也

龜峰齋讓可飲閩溪茶買所聚校之它州尚有烹茶飲酒之樂當欣然就塗也

與王倅

高才屈於佐郡豈但一邦之慶而衰老又得分餘光於鄰燭之下唯是屏迹田閒不獲修梓桑之恭不敏只目訟也伏蒙高議收錄陳人寵以長牋光賁衰晚啟讀三過喜愧交并恩慙占辭莫敘瓊瑤之報又以爲作

與張彥明

比勤誨帖屬允未果遣謝專使又枉教音喜聞春寒侍奉勝常蒙貺鮮食付以酢醢便有跼青藉草之興而出門無所詣爲可惜也拜賜銘佩

與虞守龍圖舍人三首

屬聞乘輿戒還正邦君不遑夙夜之時不敢寫書問安否伏奉手誨喜愧之深具審歲晏餘寒台候動止萬福嗣歲將興無由進賀

敢冀迎受履端之慶

賢者屈臨桑梓已復歲換省方之初輿誦如此天日所臨不待探聽而後察也仁聞新渥別行展慶

屏迹田閒門可張羅矣勤數遣騎酒醴致餉以爲衰莫之寵謹具啟拜區區銘感占論莫罄萬一

與常州知府三首

分背彌時衰遲習懶雖不數望燕寢初聆異政於輿人之誦亦足慰牙兵傳教具審春晴台候萬福某杜門藿食了無一事實刺史二天所庇也

東郊勸耕盛禮創見朱幡卓蓋父老歡迎極一時班春之盛連雨開霽若有待然殆豐年之祥也

羊腔壺酒之貺盛設謹以下拜故將軍醉尉所訶公獨遇之厚高情凜然第極銘感

與王左司二首

騎吏踵門貽書存省開讀洒然具審雪餘台候勝常某歲晚當伏
謁門下雖不畱東閣亦冀一夕之款以償此願
湖海三年念家之餘它無一事既脫池檻復還故廬一室空然百
憂所集鄙事種種無不關心方知前日念家之意專爲此紛紛也
左司耆年宿德高臥百尺樓上下示餘子何止上下牀之間耶

鴻慶居士集補遺卷九

鴻慶居士集補遺卷十

帖

與葛待制

疏慵拙於大用技窮力盡書冊遂束之高閣矣時訪客湘上山水
秀麗往往技癢欲託寓於文字之間又恐喜事者醞藉以爲罪不
如不作之安今頽然真一俗吏也何時一侍珠玉之側以洗塵陋
與趙運使二首

道中數詩絕妙開讀三歎祠館少休正堪作句天台鴈蕩之勝當
盡驅入筆端矣聞新田有百斛之入此可慶者第別一困歲增益
之加之數年挂冠於神虎門而去矣百順不輒通問

辭去彌年日望馬首之東冀得盡書登几案側聞改命持節湖南
又不果寓狀展慶卽日不審台候何似衡岳湘江冠絕天下其外
澹山礧巖愚溪浯臺之勝中州亦無有官閑領客登高臨深一弔
古人之遺跡而後知蛙盧蟻蛭之隘也歲晚尚冀強食自厚

與張從道

比上記計必省察示帖喜承侍奉安佳日鑄已領嘉餉當使貴公子舉一杯於醉飽之餘則腥膻一洗而盡藜藿之腸似非所宜蒙感愧而已

與王豐甫

南遷兩過宜春州人追懷舊德畫像祠公比屋皆是何止活千人矣天定勝人世世子孫用之惟恐不盡云甄敘更復一赦借令盡還故物豈與雞鶩爭食於籠檻中乎遇亂十年更此百罹所欠只一死雖追懲往繆一洗故習而身在吳中意屬江上凜然唯恐有聞也執事避地東嘉欲卻復姑蘇故里何某蒙恩甄敘拜賜之後衣冠俸券束之高閣如避焚溺矣竝竢南轅當以野服從公於林

下

與曾郎中

別歲餘接奉恩恩亦足少慰比日不審體力勝否新文超妙如雲

升川增姿態橫生三復驚歎二妙復有跨竈之譽皆可爲公卷賀也

與鄒志新

去違兩見歲換貽書大慰久闊卽日氣候不常尊體何如某自曹山識面遂傾蓋不復論形迹矣比脫罪籍歸首一邱便有二千里之阻近聞承議郎蔡蹈崇靈閒以殿中侍御史出爲蜀漕而沒有旨皆補其子官如是者三十人先公侍御當是一人數也計志新非久必詣行在所幸枉道一臨爲十日之款仍先期示報卽以楫迎也區區至望

與交代李待制三首

自靖康去國趨舍異路阻闊餘五年蒙恩守杭疏慵不敢奉詔逾兩月造官而公已去不獲一見惘惘至今也

向來待罪臺端公實見代流落之餘誤恩起廢又獲追繼高躅衰病疾劇豈所堪而坐嘯蒙成庶幾畫一之規也

次杭獲視治績固欲取公所棄竹馬而城上篋籬二倅廢格已久
權官悉爲漕臺所逐此外無所改作也

與莫刪定

窮巷掃軌可張羅矣不謂長者車轍之臨倒衣趨迎不覺屐齒之
折也連日接奉健論抑揚一洗憤憤喜慰不可言春和客中勝否
承與楫將次朋溪想復少畱不獲追路一陪下乘第極瞻悵

與叔詣內翰兄七首

自蒙恩貸行五千里彌一時僅次三衢三衢登舟又十五日入里
門而小師逝去久矣危坐獨哭百感俱集未果上記重勤遣騎貶
誨飭慰藉之言累紙欣愧不能喻也具審卽日春寒台候萬福某
北歸餘災未退瘡痍大作上狀不能辭也

方欲馳布少懇蒙問所需幸甚某向謀宜興靜樂山地欲葬吳氏
寺僧謂終爲人所得遂樂以見與夫何詔獄作矣比章氏歿又煩
宄屬梁仲謨甚畱意而舍弟下遂復已矣欲望興哀於存沒爲

揮一紙之書以此意禱懇詹守付此介以還投書之後當自料理
自縣申州自州申漕至時兄陪扈過杭正合浮屠尖之時也冀曲
折一言幸甚某仕不知止自抵嚴訶無可言老妻幼女何辜至此
獨有及時瘞葬尚能塞區區之哀也

吳門人還又枉手誨審已拜北扉之命翰墨之光照映一時豈惟
門戶之慶實邦國之華春序寒暄未調恭惟台候萬福某客居三
年弊衣破履久坐污垢中比還使令輩爲更新衣而以病瘡塗治
盡作硫黃臭可發一大笑也日忙大用別行展慶

名酒之貺物意兩重輒以下拜不勝銘感聞一言將諸弟過嘉何
日可還也五一知院章氏獨與之厚地隔幽顯尚復神交於夢中
信如仙佛所云無疑也

某習懶久不遣狀兩奉手誨仍拜臥龍日鑄之貺感愧深矣卽日
大暑恭惟台候萬福二娘歸李氏粗了兒女之責更得畢三殯之
未葬者當於宜興溪谷閒卜一廬而老爲馬跡舊隱悼念往昔恰

如西州門矣某過全州遇妙應攜被從之語過夕謂某去死尚遠也蒙恩甄敘義不敢辭拜賜之後不御衣冠不書爵里不請奉錢以彼易此益壽命以俟太平讀兄兩書退之意甚銳以某料之成佛必在靈運後也聊發一笑暑熱千萬調護以須大用吾兄不受書餽此盛德之事又何訾焉某自罹垢汙道過二十州辭錢數百千飲食則受之而反其餘恐是借秦之言誤左右之聽幸賜察也邱璋買木初不敢以聞適天寧佛殿材植爲戰艦所邀取方敢以爲請既用兄宅引不祥之器不敢斥言之耳自聞領貢舉久不上狀卽日秋高伏惟鈞候動止萬福比閱誠無怨無德吾兄他日持天下之平正當如此也樞轄虛位日佗進拜如望歲矣

與包思永二首

辱書喜聞侍奉勝常別去瘡益甚體作痛親家遠來書問踵至酬應良苦故於遣報亦不得詳也

數日河豚盆集苦瘡痛不敢下筋公亦致此饒貺重爲左右費悚荷之深舍妹外甥何日過此日佗其來也侍次煩起居時中思召眷集佳勝思誨前日辱教帖筆力雄健衰老降歎病閒當作報也與張无卽縣丞二首

自承太孺捐棄庭蘭之後當偶便致一書展慰繼此度嶺不果嗣音萬里生還喜見童稚而小師已亡矣孤豕歸然存舍傍里所一慟之餘殆欲忘生也辱書慰存甚厚祇深感塞具審比日尊候萬福某在桂林苦瘡瘍至此大作辜體殆遍占投益草草

伏審已襄大事流棄嶺海不獲祖奠致區區之哀甚愧緬想號慕少閒進道益德爲一日顯揚之計固所望於左右也某今以卜葬十姐爲急訪尋外棺不可遽得隱居旁近恐不爲之一訪也一切外觀無益於往者獨山當盡力爲之冀畱意幸甚與章子新宣教二首

一別十年遭罹奇禍重以閨門之變漂流一涯便與世隔北歸傳

聞得邑上饒謂不蒙一見今承許見過訪尚未造官示書喜聞里
居宜適動止均勝某四十口流離兵火中偶脫夷狄盜賊之害而
老妻幼女皆厄於此算無窮之恨遂與此生俱畢矣何時接奉以
舒此懷

客寓殊方正哭十姐而回太孺時擇承之計踵至比還小師又以
疾不救幻泡變滅乃至於此況欲較勝負於蝸牛之上乎第讀高
辭璀璨如雲升川增三歎不已殊慰別後之思也手瘡痛甚不敢
令子弟占答草草爲愧

與王道二首

奉告審聞即日動止萬福瘡瘍被體療治百方不效危坐一榻筋
骸以束欲見未果兩日貧家少閒尚冀數來奉周旋也

遠謫三年炎涼百態何所不有兒曹藥石之規朋友急難之義乃
獨見公忽蒙折簡又欲余去何爲遽如許也比還彌自計未見獲
答之所尚冀終惠幸甚

與常守詹及甫大中三首

與公同朝未嘗接步武於縉紳之末比聞畱鎮桑梓屬在部中受
賜一人之數衰病多畏不敢相聞專介臨辱尺書見寵開讀三過
大愧不敏具審春寒台候動止萬福謹上狀

南遷三月聞老妻之訃今既除喪矣萬里生還尋訪童稚而十一
歲之女又已屬疾而亡追傷之餘肝腑殆欲摧折也某平生喜誦
佛經照至妄諸是了不相關唯讀韓公祭女孥文則累世同轍也
過蒙問勞輒布一二

恩恩未果嗣音又勤教寵良戢存照恭審春和台候萬福酒醴厚
遺物意兩重敢不下拜某坐累三年餘二十州致餉悉以控免而
止獨於邦君之惠不敢辭也山地重蒙矜許當從邑中料理文字
申納戴公邱山之惠豈有涯哉

與王壽基右司三首

萬里生還伏蒙車騎寵存客眾自不獲展布私懷村僻亦不延款

之意抱此不滿寒暄未調不審台候何如門牆以瘡瘡拘攣未果
馳見臨書悵然

老成宜在朝廷屏居就閒遺物離人而立於獨真避世之高躅也
某蒙恩縱還欲攝衽從公而俗累拘牽存沒關念已若瞠乎其後
矣

被疾良已扶憊至山中風雨半之前晚舟還疲曳益甚當枉手誨
不時啟報爲愧恭惟台候萬福時雨霈然暑氣漸斂高臥北窗之
下陶元亮所爲羲皇上人不過此也何時接奉緒言一祛塵陋

與七九姪

辱書具審比日萬勝罪斥三年蒙恩北歸聞伯壽承事之訃驚呼
失聲高材達略拔貧爲富一州之望遽此云亡孰不興歎况賢子
弟篤於孝敬嬰此大故悲慟奈何比承上冢又適有馬跡之行不
果致一哀爲愧千萬抑哀自厚

與胡已茂侍讀二首

介還上狀審已聞達專介再貶手誨比日春和台候萬福某萬里
生還適當胡騎退舍之後俯就一廛養生送死無恨矣蒙恩復秩
又出餘論死灰殆不復然徒費吹噓之力也區區懷感一紙之書
可勝道哉某適過馬跡省亡妻之隙而來使至具報極草草愧恐
專使貶誨具審初暑台候萬福告命又蒙遣騎祇拜感服某自脫
籠檻屏迹田閒天寬地大徒步而游及是拜賜又若吳牛之見月
也無由詹近謹奉狀

與張彥深大中二首

方俟病閒詣舍上謁側聆前驅已入里門祇以悵望貶誨具審卽
日台候萬福伺候出郊卜見以敘餘懇

聖恩下貸哀憐故物感涕交下然吳牛見月復大喘矣向蒙恩貸
便辱遣介報舍弟輩反勤誨飭存記流落孰如公者愧慙而已

與陳漕萬

引去門牆川途萬里至三衢已盡歲矣疲曳之餘不果具記比日

不審合候何如吳越紛紛賢者當一出共濟艱厄而縮手就閒坐
看血指公議太息非朋友之私也乍歸親客紛集撥冗奉狀

與張墨卿二首

宜州再見屢被誨接高文妙英健論抑揚衰老降歎大過所望去
違各家致酒眷恤深厚感愧如何可言即日寒暄未定起居何如
新將相用事公議已申墨卿尚縮縣紱何故仁聽召歸慰林下之
望

向過臨川令子蒼舍人相從兩日而別論文談詩超妙入神真一
世之雄也然識眞者少千里之馬則在冀北而終日接伯樂之圖
豈不誤哉聊發一笑也

與李彥能

再過臨川屢接勝遊已深喜慰而迎勞送將又爲左右費厚意種
種感愧不可以言比日春和台候何如歲月可驚審已外除俟造
朝別遣記馳候

與撫守汪彥章內翰

道過安仁聞旌麾入境便欲少畱伺一見忽縣君遣吏持一幕立
縣門風示欲舍公之意遂不敢畱抱此不滿至今未平也即日不
審台候何如淮上紛紛江左諸郡如仙山佛國坐嘯而已然賢者
憂國當不計喧寂仁聽召歸中外之望也

與
■幹辦

舟過蘭溪遠勤徒御津亭小款慰悅無量還家多故未果奉記辱
書喜聞即日起居勝健五馬書言已有以處公當復少畱耶寒暄
未調千萬善護

與陳良臣

道出清江遠勤營從攜庖迎勞晤時道夕荷存照之深恩恩年分
已復改歲不審尊履何如某上元日還故里始哭十二歲女又當
感微瘴至是作兩髀之間危坐一榻百憂攻心殆無以爲情也良
臣必已造官會已屬書汪守道盛德高才屈居幕府一見決突豈

待鄙言第蒙見屬不敢孤雅意耳

與米師侍大中二首

使臨枉教具審秋高台候萬福審聞抗章得謝何去之果世亂多故畏塗如漆一路死機便同机上肉執事乞身於強健之時避世於兵亂之後高風雅望追配古人而已衰病不得從賀客贊喜爲愧也

久欲詣省非謬語也鄙事滿前竟不如約第淮上無所聞歲晚具小舟造門矣海錯已拜珍貺感作新橙木瓜兩篋附還狀馳送雖不堪食謾爲供飭之觀也

與朱守道知縣

嘉興一見便有嶺海之隔辱書殊慰久闊傾邈之情喜聆春和侍奉均慶新除去庭闈數舍之近山城正堪吏隱想公俯就爲此也何時接奉臨書惘然

與朱守中提宮

愁病更攻不果寓狀示誨慙以喜以愧具審即日侍奉安常故事祠宮佚老少年筮仕官次不出家庭綵衣華髮照映一時近世以來如公家父子之盛絕無而僅有者也尚阻詹近千萬加護

與宗壽姪

專使持書欣審春和動止增勝始至之日曲蒙存錄餉遺甚腆某以罪棄客寓地方不復記省厚意所臨重以感作衣著非所當受獨領香羊燭腔之貺也對客草草具謝

與天寧晤老二首

別去五年竄伏炎海深愧道友蒙恩北歸訪問起居消息何如定見親愛之情非淺也幼女之喪某以上元日還故里始得盡哀哭因感微恙株守一榻百慮攻心殆無以爲情也惟執事乞身以榮歸伏承杖履還里門比日體中勝否茂嘉云公欲見過固所望於左右也方此悶暑雖非老人出山之時然杖錫凌空刹那頃爾想不難也

被手帖喜承秋晚體力輕安某兩具舟楫皆以事違比緣江上薄
田久失料理舍弟亟往省之村僻無壯子弟守舍又未能脫去聞
公欲持鉢可且一行比及改轍舍弟亦歸矣決可如約也尋僧求
半日之閒昔人見於賦詠況十日同載之樂固未易得也

與常守鄭右司四首

違去五年喜聞賢者得郡蒙垢自屏不敢遣狀辱書訪問生死開
讀恍然喜愧之深具審寒暖未調台候萬福某除籍爲民不敢以
野服造門瞻望而已

屬聞開藩不果修桑梓之恭衰病多畏不足責也晉陵被兵之後
征斂益急試牛刀於割雞事固恢然矣所貴強全以須召歸之命
謫去兩日老妻感疾而亡適大暑棺斂草草藁葬山中欲謀宜興
官地爲藏窆之所然當自縣申州州申漕司漕司給據出賣始敢
用它日須至稟扣不敢自外蒙問及之不任感刻

過臨川遇暨公望甚款且追路數十里而別劇談世事無忌大語

老夫隅坐縮頸而已計今已還建陽近得書否屢有少意判官沈
某一從妹歸之俊敏能集事儻蒙知遇幸甚

與五十兄

彌月不瞻近暑雨不知尊候何如某擯落三年蠻村蛋鴨面壁而
已北還里門追亡悼往益不自聊向蒙枉過奉言燕於一食之頃
情話消憂不吾欺也兄獨居一室身外翛然無毫髮之累真避世
之高躅歎仰而已

與邵仲威大中三首

某屏棄田閒從農圃之役不敢復以姓名聞於下執事伏蒙存錄
貽書甚寵開讀三過喜愧交懷秋涼伏惟台候萬福某已具舟行
到溪上不敢以野服造門尚冀辭蒞

某蒙恩北還舊國故都歸然獨存而老妻稚女已隔存沒悲悔尚
何言中大高臥里居下視蛙廬蟻垤暴尸喋血之禍可付之一大
笑也別紙慰藉感忤而已

菴畫溪谷秀美意甚樂之欲受一廛未果也憂患餘生厭離五濁始有卜鄰之意如山靈未遽回勒俗駕庶幾杖履追從如杜子美所謂二老者

與平江趙升侍郎三首

憂患餘生屏居野處聞人聲輒悸動側聞弭節吳門不敢以姓名聞於下執事衰病多畏自應爾也即日恭惟台候萬福大暑如炮燔田閒尤甚上狀草草

習懶遂無遊城闕之意跼蹐田閒復此隆暑飲食所須求輒無之平日固有饑寒併至之憂今乃有熱而饑者世事百態何所不可以發一大笑也公鈴齋坐嘯固不病此然異時爲郡之樂一切禁格閉置車中如三日婦固景宗之所不樂也如何

猥蒙遣騎貶賜誨飭慰藉甚寵高情耐久獨見金石以喜以慰某向寓湖廣屢聞進登計公必有中上意者及是拜貺翰寵之光妙趣獨出固非吳下阿蒙矣仁便召歸以福天下

與孫朝端二首

待盡山林遠勤騎吏貶書存省五年之別恍如昨夢感悵而已涼秋恭惟起居勝常宥密之司編摩盛選別慶超用爲州里之光也別紙比鄰之言豈非農先乎某暗昧自用謗讟陷失舉世非之而獨歸咎於公固無是理也然農先信壽已隔世某亦毀棄衣冠日杖策於農圃公獨以故我見望鐫誨勤曉不覺汗下

與沈裴教授二首

比蒙臨別祇以惘然貶誨喜聞薄寒動止勝健戒轄遵路屬此屏棄不果詣行次追餞日仁新渥別行展慶

聞江陰學官以憂去公當造官日仁前驅不至尚未知之邪某所寓窮僻欲致一書問安否意不果側聆下車一紙之書遂可數登几案否

與李季修

欲見之意坐馳於門下病懶不果示書增愧喜承乍暄動止勝常

佳節又勤致餉既不敢辭殊以喧囂鄰里爲忤也人還上狀

與陳中司

自聞中司之命日望車馬之塵比聞造朝而已某負罪出頓郊寺舟楫相望不敢叩謁想蒙大察也每進對上問公來朝如望歲矣私居自喜庶幾憇拙俾佐下風而羣儉佚罰勢不得俱已卒以狂妄遣去歷陽小郡亦有民社上託餘庇少假須臾遂決歸田之計爾

與吳正仲內翰二首

某罪斥未知所向獨執事護之甚力比頓郊寺又蒙尺書見存慰藉甚厚區區欣感不能喻也去國彌時始有息肩之地占謝不敏想蒙貸察

某謫居歷陽被詔趨行戴星就道次臨淮而候吏亦至遂舍舟由陸過滁而交代見拒遂畱全椒之寶林彌月而後之官過綠河讀所畱詩板句法奇麗特出眾作之右顧罪戾不敢以言語取附託

之日三歎而已

與張參政十四首

卽日履茲涼秋恭惟鈞候動止萬福某淪棄泥塗已絕雲霓之望不謂野次有接待之款執事存錄故交不以位貌爲閒置之客右至今踧踖不遑也謹上狀

某辭去便趨荆谿路與壽朋館於橫山已乃移舟入善權故人一笑之適十日而後別也獨念大資倦飛之餘行復冲天矣恐未得專此樂也

伏蒙存省馳賜翰墨恭承嘉惠三復感歎某方圖掃門之役猶懼以疏慢督過豈敢言朝夕負荆門下謝不敏

重陽令節追歎筋力非復故時伏蒙遣騎分送名酒洗盞開嘗爲之首一昂也糟薑已拜賜恩恩莫喻欣感至懷

卽日殘暑恭惟宮使大資鈞候動止萬福違去十年淪廢田里遂復阻闊兩遇奉祠少休方屬憂畏不果一詣不察此意某方自去

歲入城省親舊欲俟新涼具小舟勤一顧第免冠久矣當以野服見也

舊德宜在朝廷乃從里居之佚所不解也然老驥一日而馳千里若自爲計安用終日行也某屢更世變種種懲艾獨盜賊之變爲不測築室田閒繫舟舍下蓋庶幾焉屬者交舊多爲淞東避地之謀而數日遇旱涸皆在絕潢斷港之中慮患如此又復大謬可以一笑淞西捍蔽特山陽一壘耳比聞起二萬夫益之使高飭轉運護其役安得猛士守之如歌風者所云也

靖之下世方遣書致奠而牧之由聖相繼逝去老人凋喪爲之泣然某輩老矣行卽此路亦奚足深悲而邊虞方急遂超然從寂滅之樂殆未見所欣戚也

大資東鄰胡簿訪別言無爲所報果可信否比敘詣去國絕江南而大資乃復北渡二巨公里中之望未知取從俟它日請和願聞之

卽日冬序薄寒伏惟鈞候動止萬福某重陽后卽圖趨拜而邊聲籍籍晨夕疑懼不敢去家區區之心坐馳而已

大資辭藩翰之寄暫憩里中門下之舊得以蒼顏白髮廁賓客之后豈非欣願而淪迹田里便有三世龍門之隔如節過而邊虞止於此也卽伏拜屏下

爲門下四十年之舊屬方竄跡農圃徒有馳心跂踵之勞殆不如執鞭弭者榮於一遇也冬序戒寒敢冀保練身命以俟徵拜

伏蒙哀惻謙勤致奠以爲存沒之寵仍枉書教開讀三復高情凜然敦獎薄俗豈但衰晚蒙賜而已空言占敘不盡感悰

羊麪重餉亦已拜嘉盛禮爲貺屬事紛然不敢草草占謝及是言旋疲曳之餘僵臥一榻百骸解散上狀不復謹好臨書以愧以恐如聞考室遂得爽塏於古城流水之間斯民之急如救焚然公遂無意於此耶所冀起踐台司以福天下

與胡樞密三十三首

歲時不能免俗輒陳菲薦忽領報章遺之大貺拜賜銘荷之深即日歲晚餘寒恭惟鈞候動止萬福某旦夕驚懼遂竟此歲南北講解少行目前過節可以復侍杖履矣

廉夫結好想盍簪之盛某久塵東閣今復有連係屬除日饋祀非兒輩所當預遂不獲一與賓客下陳瞻仰而已

余德廣累示書以不自量遂干齊大之譏固欲自竭而不能課無以責有第能舉案事梁鴻而已某云樞密方掩鼻以過崔烈儻如所云乃敢望於孟光也

某向領誨答又出雄文枉教方欲嗣遣而浹日閒暴客三至騎屋下瞰穴坏大索竟無所得乃已而老幼恟懼至今未帖席也以故久不上狀即日秋暑恭惟鈞候動止萬福新第行復斷手度暑冀一瞻輪奐之華也杜子美云何時眼前突兀見此屋今真見之矣五月久雨下田行舟已而伏旱上田之稼亦槁州縣闕雨徧走封內詣祠豐凶之決在數日閒耳第閉縱之說已不傳而變調之功

猶有望也陳景淵奏詔亟趨淮南約以秋中由建康路循溧陽入荆溪前期遣介馳告同詣門下

上梁新製不惟句法偉麗掩眾聽而詞又精確他人他處不可移用一語如千萬買鄰蓋實錄也橫山之東洪波浴日蓬萊方丈近在太湖微言妙寄超詣此所以能捲龜殼而食蛤蜊也三復之餘致之懷袖而欣幸之深矣

舍弟還聞起居狀乃枉手教累紙欣玩如接誨音於隱几之旁也恭審履茲歲端百神呵護鈞候動止萬福謹上狀

舍弟累與進又枉大旆臨顧皆非卑賤所當得於左右者歸途偶屬寒沍在舟六日方次弊廬少閒當具書馳謝橫山眷物想已班所願一陪勝餞而沙子盪舟行客皆畱滯不得去少待新漲一

葦可航卽具裝矣

舍弟歸言嘗從屏下得接廉夫立談少頃風流醞藉真貴公子而朗練有老氣想見胷中定不凡矣

卽日凝寒恭惟鈞候萬福某已遣狀忽枉教寵欣聞履茲寒令股
脾輕安已遂勿藥之喜異時王公貴愛其身金鑄之昏句取深痼
執事斷然割棄愛戀卻藥屏醫燕坐養恬神氣自復殆醫國之規
也

辭去復見歲逼日與老農相爾汝於田野之間而勢不得去度歲
無所聞當拜下風

橫山聖境復許致榻幸甚某欲牽課小詩塵污省覽書榜豈非榮
願天下至今知有鄒湛者羊叔子之故也弟非所長不足以副所
須耳

執事養恬神館屏遠時好獨專一壑宜得高人勝士如惠詢輩爲
滄州期衰晚猥蒙存省收置客右狗尾續貂可以一笑也

連日侍珠玉之側不閒位貌形迹頓空荷矜存之厚而屢勤致禮
爲左右費又不遑耳涼秋具小舟伏謁門下度已被詔追逐作擲
鼠耳蒙索鄙文獨南行詩藁尚在篋中舊所著皆失散比從三書

生錄得一編塵污鈞覽適有續至者不敢自匿遂附見別紙執事
言語妙天下而獨見收采刻畫無鹽可謂不知量也夫

某係脫罪罟追懲往謬便欲掃迹滅景於人閒望里牆一水之近
亦不敢徹聞於下執事伏蒙恩記訪問生死貶賜誨飭開讀竦然
逋慢之罪自不能文也

比舉三殯作兩塋屋於二山相望三十里之間百役紛然衰老筋
力自不能堪更涉兩時鰲面繭足種種不集騎吏臨寵適畱冢舍
侵夜方拜賜占謝不敏想貸察

除籍爲民復蒙甄敘終以滿溢爲懼不御衣冠不書爵里日從農
圃以盡餘年矣側聆弭節山中不敢輒造賓從之末如執事不以
位貌爲閒許以野服見來日當伏謁門下

某小舟由草塘路入湖泐期以回日伏拜戲下不敢遣狀重辱遣
騎寵賁教督愧荷之深某以葬室未竟襍被獨來孥累皆不至祇
今舍舟從兩夫肩輿往拜區區面陳

某數奉俎燕獨當殊遇置醴下榻禮絕諸公重以叨蒙爲愧遣騎招呼荷存錄之厚某方近喚一二挽卒於數里間至則具小舟戴星絕馳詣門下

諸郎詩語已能出妙思於艱難之中家有哲匠固自當然聞元稹修撰已就舍館遂復見一斑於楸枰之上矣

大雅姪蒙賜從容且云客至出迎氣貌豐碩而不知嘗被疾也嗣歲方興敢冀均調寢食迎受履端之慶

比枉書餽拜賜未幾使臨又領手教肴醴致餉深厚亟拜榮感之深重念大臣遺忘微賤久矣飲食教載之恩復自公始也比者女弟少畱而還騎吏至門已數日占謝不敏尚冀闊略

比領誨答方臧之以爲榮專使又辱教寵喜愧深矣作室未就雖云舍弟經營往來而老者亦畫諾其閒著木卽脫身一詣然不一二旬可冀瞻近矣

小詩屬清夫廉夫以占進退淺深之候而語咄咄未逼人矣合抱

成陰果可待也更蒙樞密和答大句雄傑遂獲瓊玖之報尚欲牽課以謝重貺而親客方集更數日別當上記仲參議和篇又辱遣賜公門下真伯樂之廢也

舟還伏蒙酥酒糟鱗之貺厚意種種拜賜銘感某省書有臨賁邱園之意它日室廬粗成儻蒙一顧衰老之幸不知官高卑玉帶垂金魚又足以追韓公示兒之作矣

清夫廉夫比蒙誨答累紙欣感無量新詩組麗坐客傳觀歡仰而褒揚之某衰老不敢當也分柿已拜嘉惠一味之甘不遺衰老愧荷之深屬以解去上狀草草

橫山別墅萬竹蒼然冠世絕境度歲欲具小舟追尋曩時曳裾之地計執事已歸廊廟尚能與衛公遣平安之報也輒布少意

張輦舊同舍晚得一官無拔援之助欲從樞密乞一改官狀僭易懼愧之至如張某老儒解事寡過某亦不敢以非其人爲門下士伏望鈞慈俯賜采錄

羊麴鳧鴨輒敢持獻田舍翁曝背食芹之意可以供一笑也不蒙叱遣幸甚

橫山獨蒙致榻餘子莫與老病疏慵誤當獎借殆有夙昔之因也別去之歲夕邇葛墟里所風雨大至不可前遂依數根網泊大澤中兢懼通夕黎明解去到家湯餅猶未熟也未能絕俗祇益紛紛耳

某小舟來赴山中之約氣候佳和亦公散菜之時輒欲就行廚治具五日從公一行惟馬首是瞻僭易皇恐

祝君進論閒讀一再辭義卓然有可用之實非近時之文也正如良醫以識病之所在受病者用其言儲當用之藥庶幾有瘳乎今同向所示六秀書並切韻類例二編謹納上

清夫廉夫不敢別狀備論二編封納東坡薦於朝以爲勝己東坡不可勝也文辭議論波瀾深闊非秦黃比未知樞密以謂如何公劇談世事常欲援民於溝壑之中至於縱情事外又欲爭席於

漁樵之際昔謝安居東山而未起則知晉祚之將興裴度去綠野而不還則知唐室之不競造物者必有以處公矣

與常州太守二十二首

寒令侵巖台候勝否陽復之辰善類之慶恭惟履茲穀旦膺受帝祉邦人與有榮焉黃堂盍簪之盛可以想見獨不獲薦一觴之壽馳頌而已

某受一廛之託踐長之始宜有頌言自懼嚴譴復還農圃所以事大夫之賢者皆不復見於進拜之禮竿牘之文徒有區區向慕之心而已高文寵賁開讀欣荷固以倒施爲作而時序酬獻紛然及是方獲啟報所恃聲氣之同遂索之形骸之外也

久欲款門不惟衰病之故自遭屏斥衣冠書狀事大之禮皆廢矣晨夕當具小舟造前儻蒙闕略遂一見之願何貺如之分違未幾負罪投荒旋被恩貸歸宿田里追懲往咎竄迹農圃凡一時同朝平居握手之舊皆不復相聞矣側聆大旆鎮臨桑梓何

意暮年分棠陰於二天之下崎嶇末路可謂欣榮即日秋暑尚熾
恭惟台候萬福某力疾上狀不盡餘懇

某歸田二十年卿大夫臨州顧以廢放之餘雖不敢以野服迎拜
道左率嘗先諸公具書修敬少道不敏而殘年投老衰相具見痰
咳作眩頭岑岑五十餘日寢食盡廢齋艦鼎來方俟小閒啟問寒
溫以爲左右所先通慢廢禮踧踖如負芒矣

高文雅奧寵賁流落哀窮悼屈陳義凜然開讀感歎非意望之所
敢及也病中輒課數語致愧謝之意詞鄙而義拙莫抒下情所欲
陳者尚冀它日

晉陵小壘如割雞破蝨耳雖不足以污牛刀實大用之權輿也第
經界之後加賦三倍家家懼此患恐非立法之初意諒以軫高懷
也頃讀曾南豐序令祖戶部詩文與子開內翰紀次行實私心所
向慕固非一日矣南豐一代文宗少所推伏獨論公詩以爲思致
一發句出驚人它文則簡古有典不少貶以就俗推重如此以故

欲得家集讀之而不可得向在錢塘方欲陳此懇尋已罷去今幸
執事辱居鄉州它日冀得償此願也

某除籍爲民不蓄幘者十五年使君開府冠蓋盡集以故未敢前
而病餘憊甚持杖而行欲俟涼秋進謁公如不棄一日之推許以
黃冠葛裘一詣鈴下區區之望也

雙緘厚禮拜貺而廢痼之久無使令不能辦答尚冀闊略某異日
寓狀欲以近世取用咨目博封之必蒙聽許

昨日復有晤對之喜經宿恭惟台候萬福勝常詒書戒食固以待
尊俎爲幸屬夜半腹疾作度不能領公享遇之意而某畱寓客舍
尚復少駐許以他日奉周旋區區之望也

方遣狀馳謝度已徹聞陰晴未定恭惟台使尊安某少意親情惠
宰乃勝仲殿院之猶子某自墳墓在湖泐歲一上冢必從容數日
如是者十餘年而以謹聞於甲子中比爲族人一幹者誣訴蓋有
所挾也一目封呈儻蒙洞照小人之詐則善類受賜不特惠親一

人而已恐勤翰墨不敢具狀干瀆皇恐

聲聞缺然不應時作疏而寒溫常談又不敢數登几案即日寒雨恭惟台候動止萬福某卜以節過詣屏下卿大夫臨桑梓人人爭一覩之快而遲頓不敏更無以藉口惟有負荆而已

戶部公遺稟始讀一過不謂投老復見斯文欣幸不可以言某初讀公詩清深雅奧固已追配古作者之後所謂四六何其富也大篇短草幾數萬言聲比字屬無艱難辛苦之態所以一代詞宗如曾南豐者表而出之以爲後來師範也某尚欲少畱俟他日馳納息息上狀伏蒙遣騎馳報愧荷之深具審冬序早寒台候萬福連雨彌旬秋稼猶未登場者兩日開霽野花啼鳥亦復欣然伏想使君同此一快之適也

伏承遣借戶部公遺稟幸甚昔南豐序李太白詩晏元獻類要與王平父深父之文皆一時之傑而令祖集敘亦在■夢寐懷想於今三十年獲遂所圖雖未盡讀而詩詞高雅有承平之遺風信乎

名下無虛士也竊願少畱熟讀他日馳送伏冀容察

閑居多故三日內姻戚以計至者兩家某病起衰憊一未能出獨有舍弟殆疲於奔命兒姪輩各逐所親以往某每念尚未登門以爲負又屬塊坐守舍俗狀紛然遣狀亦復少尚幸寬照

許假律賦日佗拜貺矣五行賦未嘗聞之某爲太學諸生僅能一望令叔內翰於稠人中前輩風流盡矣尚幸於遺書見之又得所未聞又幸也

衰病深痼桑梓之敬缺然馳心門下雖執熱待濯未喻其急也卽日秋晚伏惟台候動止萬福某與永嘉一從子同時被疾亦復徼倖一時後某而愈比來告行膚革充盈如故而某尚頽然藥餌未去方信老壯相絕如此度可以風卽詣屏著

開藩彌時獨未獲瞻近而以迫切之扣上瀆竟蒙存護得紓暴征橫斂之害豈惟衰朽被賜而一方老稚銜戢恩施沒身而後已也區區空言何足爲謝

戶部公遺文夢寐追想違今三十年矣伏蒙許賜一觀制作幸甚不謂遲暮中又得所未觀之書朝夕面請以歸遂得償所願也九日辱壺酒果餌之餉甚寵某病相仍追歡筋力雖非少壯時而團樂一笑之適皆厚賜所及也拜貺欣荷已具書欲遣忽拜教辱喜聆動情更不別狀重勤省答分貺四時纂要此奇書也凡家居避凶趨吉衛生畜養之事無不畢載爲農圃之賜尤厚區區感悚它日面陳

鴻慶居士集補遺卷十

鴻慶居士集補遺卷十九

墓志銘

宋故左中大夫贈特進邵公墓志銘

邵氏世家金陵南唐國除徙常州宜興縣至公四世皆以儒學傳其家故多名人在世議中而公與二兄尤稱於天下紹聖元符間朝廷崇尚經術推選四方髦俊聚之太學而舉開封進士亦無慮數千人公試開封中第二伯兄棗試太學中第一而仲兄彬亦屢薦於鄉文譽蔚然傾一時號三邵云公諱某字叔承曾祖明祖直清贈中大夫父詢以公貴贈開府儀同三司夫人錢氏故知制誥公輔之從女弟也公兒時錢公帥維揚榮國歸省攜以俱錢公熟視而喜曰兒有奇骨真吾家宅相也既冠學成擢紹聖四年進士第主江寧府溧水縣簿代還除深州州學教授深並邊樵陋少文公日從諸生據一席講說教以屬文辭之法耳濡目染未幾皆化翕然中有司之尺度於時擢科第者三人里父老相顧歎曰吾

州固未曾有也崇寧五年用舉者改宣德郎廣親宅宗子博士滿
歲移睦親宅除敕令所刪定官書成請補外除蔡河撥發未赴改
河東西路提舉學事又徙河北東路州縣學事三舍法罷就除知
永寧軍軍俗朴野少鬪訟而以賦役不均爲患時羣豪擅事挾
一二老吏爲囊橐高下出入自其手太守視成署紙尾而已公至
屬當造簿公曰吾民族居相望貧富相悉至互相推校不容獨有
僥倖者乃召之庭諸豪黜不用不使一吏預其閒書札爲符雜置
空札中人探一札得符者主其事纔一二推文甲乙爲差而注之
籍舉軍稱其平於是燕山之役調發民財以供軍實而貧民下戶
無秋毫之責代還屬時開邊天下多故載糗輿糧環甲執戈蹄踵
遍道公歎曰非吉徵也始浩然有歸志一旦具扁舟不謀於家人
不告於朋友浮汴絕淮而東距里門乃止居歲時又載其家入鄉
縣葺故廬居之明年金人誘諸種號百萬長驅河朔遂陷京師又
二年入淮南渡揚子經常潤據錢塘官寺民廬所過焚滅伏尸流

血數千里而公方聚百指於溪上曾莫枕高臥不聞徵呼發召之
警其先識見微雖楚穆生晉張翰不能過也嗚呼風俗之壞士大
夫在閭巷者爲獨言美行以峙聲名在朝廷者又馳騫於空文以
譁世取寵唯公居官潔身自好不以閑劇爲喜怒欣戚雖以文行
知訓導宗子編修法令號中都官而祿薄地寒實同吏隱三任十
年循道守官羸馬敝裘晨出莫還未嘗吐一詞以自鳴其不遇御
史中丞郭三益欲援公自助曰南院御史方求篤實信厚如君叔
承者公曰平生不談人過我豈觸邪非所顧也故相黃潛善呂頤
浩杜充皆宗學同寮友相善三人者更持國柄書謁滿門公獨無
一跡參知政事陳與義禮部奏召所拔也移書問所須公不獲已
請宮祠得江州太平觀從兄朝請公構與年相若又相好也每以
爲官所羈周走南北相約蚤退爲閑居之樂公以詩寄贈有相期
六十傲林泉屈指猶十四年之句至是退休五十九矣古人謂
詩以道志非空言也累轉朝請大夫淵聖受內禪遷朝議大夫太

上皇踐祚遷中奉大夫官制行以年勞轉左中大夫提舉台州崇道觀又提舉荊州雲臺觀賜三品服封宜興縣開國男食邑三百戶遂告老是歲紹興十四年也公性淡無嗜好宴坐一室以書自娛尤覃思於易趨高領妙得其所言故於富貴寵利不以干其心閒遇勝日拄一策徒步出門與山翁釋子田父野老相爾汝於東阡西陌之上頽然兩忘其所趨而有得於物外之適於是公與令人皆壽八十髮如漆黑無一莖白者三子通朝籍六孫亦以公奏任補官扶行侍坐袍笏如林印組纍纍光麗奪目歲時伏臘翁媪坐堂上子孫環擁縉笏跪起羅拜膝下奉觴稱壽喜笑謹誦如丹鳳領九雛翔集於庭梧之上宗從咸會縱觀太息一門冠冕之華當世縉紳莫與倫擬何其盛也十五年五月十三日感微疾卒於宜興私第正寢享年八十一娶同縣余氏封宜人累贈吳興郡夫人諸孤卞以其年七月十七日奉公之匱葬於縣之清泉鄉陽緜山之原上子男三人曰及之朝奉大夫新知信州曰守之故右

承議郎通判臨安府曰得之故右朝奉郎通判汀州孫男七人曰輒右從政郎建康府句容縣丞輒右迪功郎嚴州司法參軍曰輶右從政郎平江府錄事參軍曰輶右迪功郎婺州司法參軍曰輶右修職郎臨安府新城縣主簿曰輯右迪功郎建康府左司理參軍曰輔右迪功郎徽州祁門縣主簿孫女二人適右迪功郎王寵通仕郎章汲曾孫男女十九人男曰初將仕郎次補提裕禮授禮衿女尚幼公沒十八年矣累贈金紫光祿大夫今天子御極恩加區內公之子及之奉使典州方爲世用再贈公特進一日過余曰先公墓碑至今無辭以刻乃出從子右朝奉郎緯狀公胄出氏名爵里卒葬終始屬余銘當靖康建炎之亂公卿大夫顛倒失據逃死無所惟公見幾禍之先趨然遠去高視萬物之表雄峙百代之下一人而已某視公丈人行也知公爲審不敢以旣老爲辭乃次第其語爲銘曰

世途昏險

昧昧不覲

連衡交鶩

據微鑽隙

捋虎嬰龍

蹈險不慄 一跌罹凶 草亡木卒 矯矯我公 萬夫之特
識洞幾先 起幽作匿 有竈直突 積薪在側 泌泌影然
孰視弗恤 趨然遠去 去不待夕 獨立千仞 高逝八極
楚醴不繼 吳蓴欲苗 我豈區區 嗜酒謀食 禍及如天
閒不容息 獨擅一邱 漁樵爭席 千載相望 今猶紹昔
生雖有終 壽八十一 餘光發耀 貫珠疊璧 奕葉競秀
蘭薰蕙鬱 陽綵之松 公手自植 曰此佳城 可置萬室

宋故右朝奉郎王公夢得墓志銘

紹興初余自嶺表還聞里人王夢得獻陳便宜中上意命以官一時閭巷之士奔走歡歆豔以爲寵余不識夢得又方解禁錮追懲往咎營一區於村巷農圃中不入州縣不交人事積三十年不相聞而夢得所泄有迹號能吏一日余上冢繫舟津亭夢得在焉儀狀頽碩談詞傾一坐有過人者余歎曰名不虛得矣久而夢得棹小舟過余接語移日劇談時事校古推今有濟世之用且云蒙恩

假守巴東老矣不堪遠官四方句奉祠爲終焉之計余曰君相求賢如不及而公倦游欲休惜也別去纔數日夢得遂屬疾不起不及葬余甥壻蔡謙之過余言公每哀王歸州之死不爲世用今四子在門欲因謙之以見於是四人者被墨衰銜書袖中趨而至泣曰先君以功名自期止效一官簿書刀筆之閒齋志以沒欲得公銘內之壙中地下有知殆爲慰焉余不果辭次其語爲志而系以銘公諱某夢得其字也姓犯太祖皇帝諱去偏旁爲氏其先家金陵自七世祖而上仕楊氏李氏爲貴將江南國除徙常州之無錫蓋六世矣故今爲無錫人曾祖宗古祖舜臣皆不仕父景文殖田爲生業歲惡以賤買出粟授糴之得歡心於鄉里以公貴贈右朝奉郎公幼奇穎卓越有大志獨喜問學得一經手披口誦窮晝夜不息遂博極羣書爲名進士屬文詞醇深辯麗推明前世理亂興衰得失之迹與夫聖賢窮達出處之際著爲論不爲空言五年歲旦日有食之詔求直言公上書論役法五害如司馬溫公所言已

見於今日光堯太上皇帝異其言有旨召對公以布衣入見長身
美鬚眉進止安詳出五疏一役法二屯田三復武舉四均賦役五
課農桑皆切當世之務造膝開陳音吐琅然如素官於朝者天語
稱善一再卽日詔中書命以官時趙元鎮丞相當國讀公奏示同
列曰王君論事盡天下之利害非老生之常談也有不悅其言者
止授初等一官應詔命以迪功郎調太平州當塗縣主簿於是令
老矣縣事皆倚公而辦而千兵萬馬連屯江上下仰給州縣公調
發錢糧皆應期會民不知勞累政不決之訟案牘如山公一閱盡
得其情狀次第裁遣無畱獄代還監潭州南嶽廟歲滿升從政郎
授池州石埭令未赴改兩浙轉運司幹辦公事丁母安人某氏憂
憂除除淮南轉運司幹辦公事准上墾廢田轉運使議起稅賈人
販竹木市又欲抽取十之一公曰田有賦貨有稅此法也大軍之
後良田沃壤皆爲蟲蛇魚鼈之區今欲募農夫疏溝澮藝桑麻植
秔稔盡復其故千村萬落無尺椽片瓦之覆營屋廬開閭井招徠

流逋使有歸宿之處起稅則廢田不耕抽稅則商賈不至未有毫
髮之益而所喪如邱山矣轉運使悟而止用舉者改右宣教郎知
信州鉛山縣在深山窮谷中吏民獷悍強宗大姓持吏短長以爲
俗始至日閱訟牒幾千紙不以屬吏斷治出已鉏強梗之亂羣者
申冤憤之無告者皆得理所居無幾訟詬聞然日晏無一迹遇差
役出教召詣庭下按催科獨榜大門予之期期至輸之如水赴壑
無後者間有士子持牒造之庭公得其不直則正色秉義以責譙
之皆愧謝而去歲旱率僚吏禱高山神祠香火未收大澍沛然田
高下皆熟邑人請刻石識其事公弗許乃詣臺省諸司請畱秩滿
除通判鎮江府改除知歸州遂請祠主管台州崇道觀累轉右朝
奉郎賜五品服享年七十一以乾道元年十月十日感微疾而終
有詩文號萊子二十卷奏議十卷藏於家公抗志高明持論詳博
憂國愛民出於天性又生長田間日睹斯民利病而役法之弊欲
去之如救焚溺上皇帝書數萬言上時相書亦數萬言無甚高難

行之論驚世絕俗之談明白洞達孰得孰失可罷可行如東西白
黑故能感悟上聽下其書詔有司立法延見顧問左右皆動色褒
語一傳鬱然有公輔之望或者閒之止於一命已而秦公用事以
公趙相所進斥而不用公所建言已被旨立法亦廢格不行自是
徘徊州縣卒不見於功名命矣夫夫妻唐氏先公卒贈安人六男子
曰沂蚤亡曰沚曰澣曰浦曰流曰濤濤試太學中上舍隨計赴禮
部皆有文名一女適左從政郎國子正龔滂孫男三人諸孤以其
年十二月丙戌合葬於縣富安鄉陽山唐安人之墓公平生無嗜
好惟讀書至老不衰客至卮酒相對談前言往行亶亶然如出於
其時居官樂職喜事事無劇易談笑而辦余嘗問公鉛山之人稱
思至今以何道公曰治縣當戢吏屏惡屏惡不爲己甚除一巨猾
爲悚動之具以厲其餘束縛羣吏畢入於規矩不使蹈有過之地
則一境晏然高枕無事矣嗚呼使公得位行道其功利之在天下
可勝計哉銘曰

偉歟王公 一幹昂霄 大無朋兮 氣蓋諸公 學貫千載
萬人英兮 高辭辯麗 鉤深索隱 粲日星兮 健論抑揚
析毫解縷 極渭涇兮 人有疾痛 憐如在己 哀此榮兮
上書叫闈 陳義崢嶸 一鳴驚兮 帝大其言 獨令改制
復邦經兮 誰或問之 距河而止 不濟盈兮 竭來一邑
千石之鍾 噎寸莛兮 披觚導窾 芒刃不頓 光發劔兮
年徂道遠 不究於行 二豎嬰兮 嗚呼噫嘻 一鑑云亡
悲失聲兮 驥墜地走 虎生而斑 尚典刑兮 發明遺懿
纘紹前聞 鳩厥慶兮 陽山之址 瘞此玉樹 閔泉扃兮
生必有死 死而不亡 視此銘兮

和州通判胡公墓志銘

晉陵胡氏自文恭公以耆儒碩學本兵柄踐樞極於嘉祐治平之
閒功大名顯用號秦國元祐垂簾公猶子修簡公又以文學政事
稱天下由御史中丞進右轄父子相望歷四朝持國秉政名聲彰

徹距今百餘年子孫宗從席餘慶紹前聞從囊橐將使節典方州率常數十人於是晉陵胡氏爲世聞宗公諱集字子美曾王父某卽文恭秦國公也觀文殿學士太子太傅贈太師中書令太父宗炎中奉大夫直龍圖閣贈太傅父真修朝奉大夫贈太保妣韓國夫人韓氏蜀國夫人康氏公生長於富貴而篤學好修抗志厲節退然如一寒士讀書強記博覽屬文辭辯麗有家法與二弟徽猷閣直學士唐老資政殿學士世將俱爲太學生唐老世將同時擢進士第公以文恭繪像恩補假承務郎公曰二弟聯名並申足慰親望吾不復治舉子業矣調登州蓬萊縣主簿秩滿升文林郎揚州錄事參軍用舉者改宣德郎知應天府下邑縣丞是歲政和二年也諸路行方田公被檄詣軍州魚臺縣當是時豪宗大姓恃貨賂規免賦役而貧民下戶罹其害公抵縣不授館徑趨田所不使一吏預其閒相原隰高下土壤肥瘠畝贏縮之數皆應法猶懼不得其平畱三日以俟竟無一人訴者旣去而父老追遠瞻望太

息則又悉取案牘以類詮次凡山川之形土風民謠氣俗習尚之變城郭市井宮廬器服之異浮圖老子神龍之祠古今高人勝士循吏名臣之迹科別類分訂爲一書號魚臺圖經獻部使者使者讀其書歎曰丞哉丞哉豈所謂涉筆署紙尾者耶未幾朝廷遣使推行保甲會公攝令事卽日按版籍得丁壯五千七百餘人治營壘聯什伍推擇閭里素所畏信者爲首領授以旂鐺鼓五兵之器教以擊刺坐作合散之節一日兩閱於縣庭使者至旗幟戈甲光彩耀日進止截然無一語之譁於是碭山不治檄公往代之公曰縣不治吏擾之也旣至飭羣胥坐曹聽吾命斷治皆已出遂以無事代去轉通直郎充江寧府司士曹事州民命一僕持縑錢以歸半途遇盜撤縑去僕寘錢於地追捕不及而反併錢失之主人翁曰汝真盜也訴有司繫治之驗得其情曰逐盜不得而亡其錢去居人不遠矣乃命工卽其地處繪爲圖物色求之遂獲其盜實抱關卒闔府大謹以爲明丁太保公憂憂除權鎮江府司士曹事蔡

卞除使相賜田若干頃丹徒縣選取上腴而民田太半其中乃併
給之民持券號訴而蔡京方用事閱數守皆不省會虞公繩臣守
鎮江公白守取田還民別擇官田畀蔡氏訟遂息矣州人貸貴人
錢百萬累息至十倍而課責不已官急之期禁錮督責殆不容喘
公索券視之曰輸息十倍可以已乎命償本錢而止轉運使下所
屬州供其費而檄公董其事役大費重一路騷然公按城塹之高
深廣狹木以根計瓦石以枚計錢米以貫石計計日而成損其費
大半欽宗踐阼遷承議郎賜五品服光堯太上皇踐阼再遷朝奉
郎磨勘轉朝散郎通判和州建炎初盜起淮初數千人爲聚者不
可勝數劇賊張遇攻剽至境上而守將連君被病不出閉閣公率
兵民入保量城壁遠近部強壯少年聚搗木巨石分布其上勒以
軍法晝夜按行十日不歸舍遇兵傅城下技窮力竭一夕引去明
年聯數百船循江而下所過殘滅次歷陽鼓行而西秋毫不犯御
史寇防爲撫諭具功狀馳奏遷朝請郎居亡何張彥叛卒奄至於

時大將王德成真陽閒公馳書抵德曰彥眾烏合公輕兵倍道而
來可唾手而取也德至禽彥遂戮其眾方治盛具勞還忽聞苗傅
劉正彥之亂公倡言曰王室在難公等功名之會也諸將皆投筯
起立奮然請行酒竟公爲治舟楫具糧糗詰旦餞於郊由采石而
渡嗚呼一障歸然無虬蜉蝣子之援大盜沓至如踐無人境公挺
一身抗虎狼百萬之賊而蜀國夫人寓常州宜興聞公數與賊戰
晨夕倚閭寢食殆廢歲滿旬祠主管江州太平興國宮命未下而
趙峴潰兵寇含山公方病疽力疾馳赴疾益侵竟不起遂以喪歸
州人罷市迎哭數千里相屬不絕天子哀其忠特官其一子實建
炎二年八月八日也享年四十九公朴厚而工清麗絕俗之文簡
重而有敏絕兼人之器尤不樂事科舉嘗曰窮日力敝精神角無
用之空言而繫得失於一人之目旣任官則曰吾不復治筆硯於
其閒矣坐一室取舊書讀之平日喜讀資治通鑑悉列諸史几上
旁通博考推見溫公訂證前世是非得失理亂興衰之故酌古御

今救時行道之意居官任職長於治劇所泄皆有能名惟是歷陽二年盜賊滿野病守不堪事公張空拳冒白刃或堅壁固守以老其眾或召外兵以殲渠魁左枝右梧全護一方且代去矣天不假齡疾痛乘之卒殉以身悲夫公在兵閒隨宜制事皆有方略朝廷欲就知和州宣撫使張浚又欲乞公爲隨軍轉運公以久去親庭力請奉祠而毫釐之差遂隔幽顯訃聞蜀國哭之過時哀不衰又十三年當紹興十一年蜀國捐館舍諸孤以其年十月二十日奉公之柩從蜀國葬於宜興縣蜀山之原公兩娶曾氏封恭人皆丞相文肅魏公之孫有賢行胡氏大家聚族數千指內諧外附無一閒言恭人嫠居年未四十不御酒樂燕居如齋敝衣菲食如僕賤者享年六十二年九月二十四日以疾終於長子喆崑山縣舍其年十二月二十日合祔於公之次生二男子曰喆右奉議郎曰喆右通直郎簽書鎮江軍府判官廳公事三女文林郎節度推官周堯佐右從政郎蘇泌右修職郎王嘉言其壻也孫男女十

三人男曰澤淑洪冲衍浦孫女適右宣教郎主管臨安府城北右廂公事邵軫右從政郎楊崧右從政郎李愿右從政郎李攄餘尚幼某曾祖職方與文恭公同登天聖二年進士第曾祖以長女歸文恭冢嗣金紫公封清源郡夫人於某爲祖姑公之伯祖母其後某之從妹又歸公之子喆有累世婚姻之好而某與公同年於辛酉公沒四十年猶能志公之墓銘曰

胡氏儒先 奕世載德 大名發身 老謀幹國 一柱堂堂

丞輔樞極 孫枝如林 攀提千尺 出殿侯藩 入侍帝席

歷事八葉 爲宋巨室 挺生我公 萬夫之特 貴介公子

敝綈菲食 俗學之陋 空言無實 探道著書 稽經諏律

句法雄深 可紹莊屈 游刃恢恢 尤便治劇 披觚導窾

如破雞肋 機張鍵閉 鬼神莫測 盜起淮壩 蠶聚螿出

孤壘塊然 身危志殖 不煩尺箠 坐制羣慝 屏蔽一方

人安戶逸 天子嘉之 賜金贈秩 卒殉以身 遂感微疾

藥石靡救 俛仰一昔 訃聞嗟悼 閱有加覲 高名大節
煌若星日 著之青史 終天不沒

頌

黃帝封泰山頌

昔在黃帝膺土德之運躬徇齊敦敏之質修德禁非監於萬國涿鹿之戰既勝包干戈而勿用爰舉風后力牧之徒同德左右康濟天下開明堂以朝四夷作咸池之樂以文頌聲上之日月星辰之序下之鳥獸草木百穀之宜若大若小罔不作又於是登封泰山勒功告成神靈居歆萬方和會功大德備爲五帝首可謂盛哉封祀之禮尚矣無懷氏而上制作之文不經無所述逮黃帝之興創法立極禮制樂備然後山川鬼神封祀者爲多焉三代之王文獻相承云亭社首之盛雖概見於詩書而稽古禮文之事多自黃帝發之是宜爲頌詩以紀洪烈頌曰

維古至人 德盛而帝 嗜欲開先 以德薦瑞 涿鹿之原

布昭聖武	風揮日舒	莫敢余侮	旁招俊乂	彌亮帝工
風后力牧	常無大鴻	乃開明堂	駿奔萬國	乃奏咸池
簫勺羣慝	正名百物	言順事成	推筴迎日	以監太清
鳥獸蟲蟻	百穀草木	萌區異狀	罔不率育	土石金玉
利功川濟	水火財物	資用不匱	垂衣而治	匪疾匪棘
厥壤可遊	仁壽之域	符瑞紹至	雲物翔洋	乃建官師
以定厥祥	協氣橫流	陽開陰閉	薰爲太和	弗肅弗厲
功大名顯	爲五帝先	具著顯庸	升中于天	肆作元祀
發號垂鴻	蒲車委蛇	至於岱宗	維山巖巖	奠茲東魯
神明之隲	氣澤所聚	類於上帝	來顧來歆	百神受職
欽若有臨	奉盛以告	鄙上之黍	三脊茅藉	酒醴維醕
匏樽藁秸	大禮無文	神之聽之	厥聞惟馨	天地丕應
不謁而獲	卜世彌長	授以神策	三靈悅豫	四方和來
德音孔昭	萬世由之			

鴻慶居士集補遺卷十九

鴻慶居士集補遺卷二十

跋

跋葛魯卿爲趙彥忠墓志銘後

魯卿待制以文辭議論伏一時嘗有里中大富人輦重幣詣公請銘其翁而不答士論避之余觀趙君一志大書深刻傳誦一時知其無愧辭矣晉陵孫某書

題陳紹曾詩後

葛亞卿給事初第時賦律詩百韻贊樞密蔣公一時士大夫傳寫幾於紙貴矣此陳紹曾詩以百韻見今日三讀感歎云紹興戊辰十月旣望晉陵孫某題

題惠洪詩後二首

鄭昂不具眼以鼠爲璞玉使思勤道潛無恙惠洪尚不堪作奴安得薄之然天下至今知有洪者以歐陽文忠公東坡先生之言也如惠洪文辭凡陋正如李赤之擬李白而自託於昂蜚蜉轉圓螂

蛆甘帶以類相從不足怪也余寓曹山偶讀甘露集書此贈如老
余偶見甘露集辭語凡近無可采者遂書數字於卷末徐葆光見
之拊掌大笑曰腐鼠遇周人而散之矣余聞之曰吾言不爲公等
出也江左諸儒爲耳鑿所誤學惠洪詩口誦心惟如參無根禪可
笑余哀其無知作數語以禁憤憤者爾若夫人日與李杜韓柳相
對於黃卷中而不知惠洪之陋吾不信也

題魏公所藏先少師陀羅尼經後

大丞相魏公之皇考少師事親以孝聞方懷國母夫人被疾訪名
醫治方藥手和湯液嘗而後進日旰不食夜不解衣禱祠僊佛繕
寫經咒皇皇然百方救療至求之於茫昧不可知之閒庶幾於一
遇服喪三年號慟不絕聲啜粥飲水杖而後起雖曾閔之孝不過
也建炎之亂自壽春南渡徙避京口遇疾而薨生之具盡喪於
兵火獨有當年手書大悲陀羅尼一咒時丞相猶未束髮以手澤
什襲藏之每拊卷開視悲慕號泣如聆音聲如睹笑貌以慰釋霜

露之思距今四十年如一日嗚呼孝弟之至通神明造物之報不
在其身有子爲天下宰大亢其宗爲宋巨室地下之靈殆爲慰焉
某竊觀紹聖初朝廷按元祐大臣和戎棄地之罪至崇寧新宰相
用事又疏具姓名第爲四等刻石朝堂號奸黨碑由是進取之士
以和戎爲諱而靖康夷狄之難不可勝言隆興中虜人擁萬騎據
淮楚今丞相以禮部尚書單車馳說得其酋領不死於兵自今始
矣崇寧以來屢起詔獄讎復故怨獄吏以風鐫磨鍛鍊破家覆族
積至六十年無一脫者今丞相當國會有讒慝據言路作大獄陷
正人有司驗治無根始以實告天威赫怒逐讒人釋無罪制獄平
反又自今始矣夫臣事上莫大於忠孝孝以傳家忠以謀國和戎
消兵使生靈無伏尸流血之禍平刑緩獄使良善無刻肌刮骨之
冤布宣聖主好生之德與天下並受其福故世論以謂漢宣帝中
興相魏弱翁成神爵五鳳之治今天子大有爲復得魏公爰立作
相偃戢干戈蠲除羅織駸駸然向兵寢刑措之盛千載之日越宇

宙而同時非偶然者也天胙忠孝當蒙十世宥而魏氏之興亦自今始於是退而書之以爲世範年月日具官孫某題

書道經一

老眼視物空中隕雜花天上見兩月舉世皆然毗陵崇勝寺老僧一夜夢人捫其目殆所謂金篦刮膜者且興瞳子瞭然可視秋毫於百步之外於是治筆硯作小字書佛經一揮數百千言如蠅頭如錐末如海沙如雲中雨自然平均無有粗細疏密嘻亦異矣成都有古仙人吳彩鸞善書小字時人莫及書佛本行經六十卷函之延祥寺藏中世以爲寶今公所書蓋與彩鸞並傳於世宋隆興初元歲次癸未八月日書

跋董待制畫

王公貴人以山林之樂不可得而兼始屬畫工作蒼崖翠竹古松流水於高堂素壁曲屏團扇之上以寄耳目之觀令升卜築荆谿盡得山林之勝風花之晨雪月之夕俛仰百態李營邱之神逸范

寬之雄奇皆在吾目中矣安用此紙上影耶

跋張正素帖後

正素先生少年策高第而養親不仕閉戶治書四十年以清節高行稱天下手校書萬餘卷藏之又集古刻爲金石錄千卷尤工字畫蕭散簡遠正稱其貌殘章斷簡人藏去以爲榮旣沒諡正素建炎南渡圖書燔滅今一二尚存者韓公所謂流落人間者泰山一毫芒也

跋漢逸楊公帖

米元章書爲今世第一而漢逸所藏楊公帖人疑是元章所書余謂孔子旣沒羣弟子尊有若事之貴其似也不爲之辨

宜興姜宰來文昌集書其後

孚言縣尹索余所爲四六余曰骫骳之文應用而已不足觀也而屢請不已遂手鈔三編遺之昔之文有大稱意而人大怪之者遂不敢辭仍是十日事也歲次癸未九月日蘭陵孫某書

跋張安國疏後

紫薇舍人安國張公舟過望亭遊普利寺至方丈小榻長老達明曰此一方大檀越欲施田供僧飯而未果乞公一言助施公欣然命聯十紙爲一大卷索筆書數十語遺之不點定一字皆佛菩薩語明老一日攜以示余余曰安國今天下第一人文學蓋出於天分故落紙生煙咳唾爲珠玉非若臞儒墨客捋鬚鬣琢肝腎樹肩顰眉求一言一句之工者也世傳白樂天十八世爲儒出而從事則現官身退而談空則現大居士身縱橫所植無一不可故余於安國亦云乾道初元十二月日晉陵孫某書

跋瑩上人大慧禪師傳

大慧禪師塔成少保張公爲作銘而瑩上人又撫銘所不載者續一傳紀次詳博文義粲然蓋實錄也余曰劍已逝矣尚區區刻舟記之耶瑩曰釋迦以文教必託於中國之世而大慧爲天人師吾不欲其無傳也隆興甲申十一月旣望孫仲益書

跋曾魯公帖後

魯國宣靖曾公嘉祐治平中偕魏國忠獻韓公爲左右丞相奉詔立皇子立皇太子被顧命立英宗神宗爲皇帝翊戴三朝貴極公師功蓋天下與日月爭光矣某政和閒始識公畫像於景靈東西兩宮又觀國史讀公傳今又獲睹公筆迹於簡牘中正衣拱手瞻望悉如詩所載伊尹周公者韓文公有云富貴無能磨滅誰歟凡侯王將相蓋棺之後與草木俱腐者多矣惟宣靖公薨謝於今九十二年士大夫聞其名讀其書如泰山喬嶽仰視竦然魯穆叔所謂太上有立德其次有立功雖久不廢此之謂不朽者也

跋邵仲恭帖後

龍圖公前輩盛德余不及見也以書法稱天下一時道宮佛寺隆樓傑閣多其書榜而不知其能詩也公叔孫曾裕中出公詩藁讀之清新雅奧自成一家開卷數過因誦白公詩曰破柏作書櫃自題白樂天前後七十卷大小三千篇身是鄧伯道世非王仲宣只

應無分付畱與叔孫傳故余於公亦云

大全集跋尾

大全集紀次無倫真贋相參然亦有前後集所不載如老蘇水宮九日上魏公送僧智周三詩叔黨颶風思子臺二賦亦附見此集余故兩存之東坡詩文雖黃門之作猶不可亂真況餘子乎但此書致布出誤後人耳目爲可惜耳甲戌九月十二日仲益書

跋邱道源與曹輔之帖後

邱公寺丞前輩盛德基木拱矣而典刑猶存於翰墨之餘開讀三過觀其所予又以知著作公之賢也隆興初元二月日晉陵孫某書

跋蘇養直尺牘後

蘇養直以清江曲爲一世文士所賞拔知名海內今四十年紹興初朝廷欲用之屢徵不至余曰養直他日當得道已而果然舉上人出小簡數十紙示余余曰養直不用尺寸之柄汲引後來於一

言一句之間殆過黃金百鎰矣晉陵孫某書
書舉季若詩後

舉上人讀儒書通古今每與蘇養直王性之爲方外友比過余袖出近詩數百篇讀之字字句句皆有來處非若星心月口啼號於風枝露葉間者也晉陵孫某題

跋志新三帖

東坡先生無恙時羣訾交攻毀書滅跡殆不容於世蓋棺之後文章翰墨散落夷夏重如珠玉寶貝而錦囊象軸之藏贗本常居八九獨志新所示乃真蹟也公嘗哀陶淵明云貧賤常在身前功名常在身後二者不相待也悲夫大丞相荆國公率意而作本不求工而蕭散簡遠如高人勝士弊衣破履行乎大車駟馬之間而日光已在牛背矣法書不可無法而高風遠韻當絕出筆墨畦逕之外惟魯直之書爲然建炎以來名章俊語盡集於上方而魯直骨已朽矣哀哉

跋鄒道鄉陳瑩中江明表帖

侍御鄒公直道立朝歷三院御史名聞建中靖國之間蔡京用事坐鉤黨遂廢不幸早沒余不及識也比抵罪南遷道臨川始與公中子志新遊得公行狀讀之爲出涕志新一日出示諸公手簡數紙筆跡宛然三復感歎觀諸公之所與則又知志新爲郢公之子也

命朱監倉東軒名

朱德固監常州倉寓崇勝寺結廬數椽吏退退則休息其中屬余製名書榜余誦東坡詩云但見東軒堪隱几不知公子是監倉遂書

贈筆工柴珉

晉陵多筆工士大夫市筆者往往以名求之有柴珉者後出工製美妙作宣樣尤奇巧書以事者勿爲耳鑒所誤也
題蔣宣卿所臨東坡虎邱詩

學佛者陳慧驥出蔣宣卿所臨東坡虎邱詩筆精墨妙雖不可到而義類良是恍然如見陳驚坐也

祝文

儼畢繳隊祝聖壽文

青衿雲集嘉小道之可觀華表天垂仰容光之必照妖氛殄滅佳氣鬱蔥宜端拱於穆清以道迎於景貺皇帝陛下伏願降年有永受祿無疆御六氣以順時合三靈而薦祉百神受職川嶽修貢而效珍五緯就盈星月連珠而合璧方迎春而薦臘亦除舊而布新出自清衷敷於蒼震元嬪就館茂法種稷之繁百世卜年永隆龜鼎之祚

致語

儼隊初出致語

臣聞南正司天無俾神人之雜夏后鑄鼎以紀山林之奸苟非聖明孰知情狀昔高陽有不令之子歷前古爲大厲之階始命大儼

式誅小醜周人攘磔達春氣於九門漢氏傳呼投赤疫於四裔桃
弧棘矢以赫厥靈鬱壘神荼尚存遺烈自時厥後振古如茲恭惟
撫字含生範圍元化過憂微孽或害至和乃受祀於儲神欲躋民
於壽域今者王春甫近星紀將回餞送餘寒方迎新於嗣歲祛除
陰慝用集福於清躬宜令侂子之倫歲奏時儺之伎
儺隊逐厲文韻語

帝君高厚念此下民孰尸殺生分命有神尚憂茅孽地大眾夥物
彪神如或形么麼申命貞靈時狩后土督視四圍莫余敢侮維時
歲終老陰用厲囂昏憑行實煩厥類罔象夔魑旱魃猖狂木石之
怪魑魅魍魎蝎蜈蚣蛇爰暨畢方嘯其朋傳附屬依託爲厲爲瘡
伊其相譎高明之家晝日爲已得味蒙俱毒歐已避復肆矧
乃巫覡譏罵不恥奸極伎窮止以益死凡我眾士是殪是戮殄類
鋤根俾無遺育保我幼艾以弗不淑上帝好生大網惟疏干命自
投磔汝幽都廓然妖氛雲散風靡至和嘉生歲不疵癘惟明天子

如日之升物盜有是而敢顯行惟明天子傳序古帝操執斗柄運
行歲次清明在躬負辰垂裳大開明堂以顧萬方

青詞

羅天保安大醮青詞

天威不違顏而精禋之感自通人窮則反本而疾痛之呼必應敢
效芹甘之獻同伸葵向之心伏念某等兩值秋防犯塞焚剽之驚
薦至夏潦橫流昏墊之苦家家如燕巢幕無莫居者人人如魚在
鼎尚假息焉一方羸瘵之氓委溝壑何疑四境椎埋之惡操鋤梃
欲起蓋藏盡廢於道路流移之後瘡痍必作於春冬饑饉之餘藁
然螻蟻之生惕若淵冰之懼用是懇懇上扣閭之請拳拳輸伏地
之祈偃僂望紫極之尊齊祓款玄宮之闕集羽衣之勝侶誦藥笈
之靈篇祈星珠月璧之垂光伫風馬雲車之來下閔眾生之多罪
伏外道之羣魔振兩地赤子之窮弭四郊戎馬之禍五兵偃戢百
穀登成大庇帡幪之中高脫網羅之外優游生死獲保餘年涵泳

太平永依至道臣無任云云

疏

天申節祝香疏

伏以赤符題五德之期皇業紹千齡之統日從北至皆化國之長風自南來共楚臺之快盍申善禱用扣真乘伏願光堯壽聖太上皇帝陛下名高寶地千佛之經位冠玉京羣帝之首按八龍轡而揖金母於瑤池之上駕五雲車而摩銅人於霸城之東方期汗漫之遊又見蓬萊之請

天靈節功德疏二首

伏以穆清受命肇興出震之祥曆數在躬茂對卜年之永矧自璇霄而撫世紹膺鴻號之長生恭惟載夙之辰重視無疆之壽伏願丕承景祚增錫純禧時乘六龍按統千歲皇天佑於一德克享神休夢帝與我九齡永爲民主

伏以祐民而作之君篤生上聖繼天而爲之子永命有邦仰載夙

之應期當猶盈之歲月重明久照社發祥陛下伏願嗣曆無疆

如川方至天授泰元之神筴已介鴻休歲以八千爲春秋更符善

頌

請堅老住菴疏

伏以天道無方曾何決擇宗風有自所在流通惟隆報小菴實家山舊隱隲內桃花正發峯頭菡萏還敷不有高人孰成勝事伏惟堅公禪老傳天風之正法作因勝之名藍緇素歸依天人致仰志輕榮勢心慕林泉敢分慧炬之輝光用燭冥途之昏暗三家村裏總是道場十字街頭未爲奇特何必拈槌豎佛方名接物利生宜大振於慈風卽莊嚴於淨土存亡普利泉石增輝况小道必有可觀而當仁在所不讓良辰易失使便難逢鑒茲懇誠無勞撓避請長老坐開利疏

得佛心印般若流譽大千在我門中辯才今爲第一而況發地藏之眾寶鼓天雷之大聲果有當仁先傳師法恭惟禮清溪之坐投

建隆之衣聚萬種之雲光烈一時之風雨釋梵眾聖扶成智慧之言王公大人驚動聰明之聽北方龍象未有前聞我等一眾稽首歸依

請妙老住墳菴疏

蓋茆一席容膝有餘良藥萬金安心是法如公長老夙心不昧冥契自投於來世當有大緣故所遇作大佛事望松楸而拱矣方懷風樹之悲聽瓦礫以熾然行見雨花之墮

延壽堂疏

般若光中智愚所聚涅槃路上凡聖同居堪嗟有限之一身盡落無聲之三昧撒手塵埃之外舍緣泡影之間煙盡灰飛休問本來面目出生入死還他无位真人道吾靈骨有誰尋曹洞閑名空在世雪峯當年造塔自要安身崇寧此日建堂普同供養透網底奉饒黠額沈凝者特爲書銜圓寂歲華總題於後非準鄉井累見且要一狀領過

鑄羅漢疏

變化飛行本無住相莊嚴淨供須假信心欲持飾像之良工當有布金之長者願祈樂施共結勝緣不到石橋見尊者之五百何妨寶聚滿世界之三千

茶榜石語

謂茶爲苦以蜜說甜同在一塵執知正味某人以廣長舌說第一義以清淨眼證不二門應感而現法身隨緣而作佛事眾狙進果百鳥銜花鳴兩耳之松風倒一甌之茗雪三竿紅日上正熟睡時兩腋清風生不妨仙去

開利寺建經藏榜語

釋迦如來爲此因緣出現塵世彌勒大士建此寶藏示跡天空眷言四十九年駕說五千餘卷若欲一切處作大佛事要須諸信士勤轉法輪況經九死而取經譬舍全身而求偈原夫至聖發四弘之願蓋爲羣生渺八風之波今既見佛聞經便好迴光返照庶續

無窮之慧命永作廣大之津梁更能透出趙州轉處機關自然會得藥山遮眼時節

祭文

包氏妹出殯祭文

嗚呼哀哉某政和初與吳氏妹侍先妣太淑人將吾妹歸於同縣之包氏包氏大家勝衣冠者數十百指而夫君褒然獨秀蔚爲宗廟瑚璉之器後四十年而吳氏病歿於京師又四年而太淑人感疾而逝中更喪亂死生契闊而包氏尊章亦已下世獨吾妹克相其夫男冠女婚持門戶之寄謂當壽考百年與君子同老兮云何一病而遽蛻嗚呼哀哉追數存歿兮閱一瞬於三紀嗟余歸然猶存兮隻影隨而臥起始結褵以餞其行兮又窆墓而送之死鬱萬感以中集兮溢兩背其如洗手足情所鍾兮此身沒而後已魂彷彿以來歸兮歆余觴豆之薄祭伏惟尚享

焚黃祭考妣文

某蚤承先訓束髮授書兩踐詞科濫升冊府四備省臺之列五塵儒學之官寢冒朝榮遂登詞禁躋華延閣出守便藩惟聖主推曠蕩之恩追本教忠之自而人子致哀榮之極肆疏飾壤之封起躡崇階進都顯號先考承事凡七封而至朝議先妣太孺更三賜而至令人玳首鸞囊朱衣象版丕顯三朝之命光賁九泉之幽

祭前室吳氏文

恭惟伉儷之好實同貧賤之交天不假年死生契闊追慟九原之隔貪榮一紀之餘託備藩維追參法從爰舉終衣之典實資內助之賢象軸錦囊光賁泉壤英魂如在歆此寵靈

祭百一兄文

嗚呼吾兄之歿十有四年中罹多故共畏禍連避盜祖遷靡有定所炎海之陬又以謫去生還萬里歸視殯宮久不克葬有愧在中荆溪之陽牛山之阻卜云其吉安以卽路護外有棹舩中爲堂旣固旣安萬世之藏

祭吳淑人文

嗚呼胡騎南牧乘輿東遷羣盜如毛彌滿四海命也不淑更此百
罹孤魂惇惇二紀在殯心顏兩愧若負刺芒大懼餘生齎恨以沒
順山之趾玉泉之旁載訊載占卜此玄宅修嚴葬禮肇啟敢塗推
擇吉辰登進舟御神靈如在不震不驚船開艣鳴信宿而至躬陳
薄奠以薦一哀終天之訣有淚如洗

祭女二娘孺人文

維年月日謹以清酌庶饘致祭於女二娘之靈嗚呼哀哉與汝爲
父子三十有一年不謂衰老棄我而先天平何辜不畀汝壽一夕
遇疾奄忽不救繫女疾革害於語言訖夫與子半辭莫宣天降災
殄莫謂汝酷人誰不死抱恨就木汝夫館我迨十年餘羹藜飯糗
共其有無豈謂女亡而有濃厚庶幾久要定此窮陋二雛呱呱誰
撫誰憐如見汝面在吾目前歸女教男冀成汝志吾雖老矣猶有
兄弟獨念汝夫強仕之秋誰復爲汝瞻守一邱先墓之次卜此新

宮二山相望我祭其從季冬之月吉旦庚午汝其顧歆以封以樹
念汝永歸五內若焚拊心慟絕汝聞不聞嗚呼哀哉尚享

祭鄒次魏文

維年月日晉陵孫某謹以清酌庶羞之奠致祭於亡友鄒君次魏
之靈嗚呼嗟我蠢愚罹屬罪罟白首龍鍾投畀南土交親解散磨
走狼顧如避垢汙掉臂而去病臥空山一室環堵爭席滿前擔夫
爾汝之子英妙文中之虎攜書御袖過予逆旅議論蠡出稽有闕
文東序九鼎十鼓翰墨之場羣獻侯侯引脰有闕歸耕十變寒
暑相望一涯二江之阻有闕我漢陰之圃倒迎門喜有闕別
幾何俯仰再撫千里計有闕許老人无徒吾孰與處子有闕
取韓愈書來徵銘藥石之有闕致未及子睹掩卷有闕大哉
心平不能以寸神而明之與天地準異端曲學非聖之書逃楊逃
墨卒歸於儒菑之闕之斂華蹠實采采斯田有苑其特我倉既盈
三百維困紅腐相因以發陳陳

哀詞

楊公大夫哀詞

左朝散大夫主管江州太平觀晉陵楊公以紹興五年六月壬戌遇疾卒於嵯縣之寓舍家貧喪不能歸諸孤以遺令葬於縣之清化鄉福泉山之原上某爲兒童時嘗從公授章句公妻宜人又某之諸姑也念無以致其哀者乃哭之以詞公諱植字彥安中元祐九年進士第慷慨有大節素貧賤晏如也左丞蔡卞貴震一時欲以女妻公公辭不就故相蘇公讀公文而歎曰非近世之時文也以館職薦於朝雖不果用而名號隱然爲東南之望矣太上皇帝卽位詔中外實封言事公慨然上書請解元祐黨錮以崇寬大之恩反覆開說有人所難言者久之有司第其書入邪等坐是斥不用流落州縣三十年建炎初政稍追錄舊人之在籍者而公已老矣生三男子曰炬曰煥曰煒皆屬仕籍能力學世箕裘炬舉紹興二年進士第中之煥煒尤長於文辭追述公生平之大節以俟當

世能文章名卿大夫功德識其墓詞曰

有美一人兮貌豐碩而頎頎佩芝蘭而服明月兮冠切雲之巍巍吞雲夢之八九兮吐千丈之虹霓橫四海而高逝兮背一世而獨馳繫受才之雄鷲兮挺巨木之百圍萬牛回首而莫致兮森溜雨之蒼皮羌黨論之方興兮千夫聚而撓椎哀古人之離患兮紛白首之纍纍紆中心之憤悱兮排帝閭之九扉嘉言一發而逢怒兮亦坐鉤黨而錮之孤雄束味而不鳴兮蚋薨薨而聚醢九牢棄而不御兮羞董喙而療饑悟驚俗而來患兮終老乎枳棘之卑棲刻山之叢叢兮冽之水清且漣漪藜杖葛履往來其閒兮挾簞瓢而帶鋤犁遂奄忽而不反兮飛上天而騎箕風厲厲而造哀兮宿草變而春菲山川鬱其如故兮淚疾下而沾衣遣巫陽使下招兮魂之來兮是非度中流之兩旗兮猶想像於庶幾嗚呼哀哉

鴻慶居士集補遺卷二十

鴻慶居士集四十二卷業已刻入前編後見孫尙書大全集多出書四首啟三十九首詩八十五首表二十一首狀三首外制二首記二首序三首賀啟三首帖七百六十二首跋語二首頌一首題跋二十四首墓志三首挽詞四首青詞一首疏九首又前刻內簡尺牘十卷四百十八首皆集所未載者又於尺牘注中得文二首彙編二十卷而尺牘已刻全書自卷十一至卷十八止列其目書不復刻鴻慶之文實南宋初一大作手先有閩蜀兩刻中間雜以翟忠惠文鴻慶集四十二卷其子介宗所編大全集七十卷爲宋以後人所編增益及倍而鴻慶有而大全轉無者詩五首挽詞六首志四首啟三首跋七首外制三首劄子三首昏書兩首序四首題跋十四首贊一首墓志十一首似編大全時未見鴻慶集實不可解鴻慶生於北宋近接元祐諸君子敷歷中外年又耆壽典故嫻熟文詞彬彬名章雋句晚而愈精實有百世不磨之概惟流傳鈔本譌謬百端今爲彙刻之又可冀百年之存矣惟翟忠惠文無

從分別爲一憾耳光緒戊申十一月武進盛宣懷跋

